

讀
禮
記
二





讀
禮
記
(二)

趙良齋著

中華民國二十六年六月初版

* E 五二五六

有

讀

二

著

者

趙

良

靄

發

行

王

雲

五

印

刷

所

商

務

印

行

書

館

發

行

商

務

印

所

書

館

上

海

及

各

埠

(本書校對者朱廣福)

編主五雲王

編初成集書叢

記

禮

冊

讀禮記卷七

少儀

問卜筮曰義與志與

人於卜筮必以其事命之如曲禮曰爲日假爾泰筮有常假爾泰筮有常是也此獨不指其事而以義與志爲兩詰之辭者是其人隱秘不言而欲默索諸鬼神以定吉凶大約出於志之不正爲多故鄭以此爲太卜問來卜者之詞徐氏謂求卜者自問其心之詞皆先審慎其事以決其當問與否也集說乃謂見人卜筮欲問其所卜何事已旣不爲人卜又非求卜於人而以旁觀作泛問也何爲

負良綏申之面拖諸幣

散綏之本繫於車而僕執之以升良綏則僕負之以授君而君執之以升其申之面拖諸幣者鄭註所謂由左肩上入右腋下申之於前覆荅上也朱子以此爲僕在車下之時方氏以此爲僕在車中之事但玩其下以散綏升則朱子於文義爲順

不旁狎

狎之爲言近也習也狎於賢者能令人敬正道也而旁狎則不出於正而出於岐其人旣不足敬而妄相親暱之餘遂益長其傲慢之氣所謂燕僻廢其學者此矣豈必如宋之華弱樂鬱以相優相謗而至弓楷

於朝始追悔其狎之失哉。

爲喪主則不手拜

鄭註手拜爲首至地卽周禮空首拜也。婦人以肅拜爲正。士昏禮婦見姑姑興拜贊禮婦興拜此其拜皆不坐。惟舅姑旣沒婦入三月奠采於廟則拜而扱地。鄭註婦人扱地猶男子稽首是雖稍重於空首而亦手拜也。若爲喪主則不然。小記曰：婦人爲夫與長子稽頰。稽頰者觸地無容隱之甚者也。婦人降其父母之重而移所天於其夫。雖遭喪卒哭之後要經不除下文葛絰麻帶服亦稱乎其拜而已。

會同主詡

禮器鄭註詡猶普也遍也疏謂王者撫有四海宜發揚其德普遍萬物竊欲取之以釋此經蓋會以發禁同以命政征不庭則德施無梗矣均所守則德意愈洋矣所謂詡也自列國爭盟會同之地嘖有煩言有能咨國家之故實述先王之訓辭以折服乎鄰封如國僑叔向之倫亦鄭註所謂敏而有勇者然視王者之氣象相去遠矣。

客爵居左其飲居右介爵酢爵饌爵皆居右

此約儀禮鄉飲酒而推言其意也。按儀禮主人酬賓奠於薦西而賓更奠之於薦東記曰：凡奠者於左卽此客爵居左也。一人舉觶奠於薦西而賓仍奠之於其所記曰：將舉者於右卽此其飲居右也。介爵之居

舉觶爲無算爵始皆非奠而不舉者也。禮於酢爵未明奠置之方。但介酢主人不於阼階而於西階。及主人卒飲而奠虛爵於西楹南以賓席南向觀之則亦右也。儀禮無僎鄉飲酒義有僎而無卒爵奠爵之事故鄭註讀僎爲遵。遵者之禮詳於鄉射其獻酢皆在西階與鄉飲之介略同或以遵來觀禮或有或無而僎輔主人則必有之。謂宜讀僎如字然如禮記祇以東北定僎之位而不以左右明僎之爵何也。

贊幣自左詔辭自右

幣必先獻於君則受之者自左爲禮。辭必下及於人則傳之者自右爲尊。且左者義也。右者仁也。幣自外來裁之以義。辭由心出本之以仁。贊之詔之各有其方亦欲輔君以仁義而已。

其有折俎者取祭反之不坐燔亦如之戶則坐

折俎爲設饌之尊者取之反之不坐非特以俎有足而高亦所以明敬也。燔爲從獻之物禮亦如俎而惟戶尊則皆不立。按少牢戶入既坐祭牢肺牢幹黍稷魚腊皆兩佐食爲之授受及主人酳戶賓長羞牢肝戶取肝換於俎鹽振祭疇之加於菹豆亦無興坐之文迨至儻戶於堂則興而取坐而祭復興而反之戶爲神象亦有因大夫之尊而稍卑者况賓客乎則知折俎不坐固禮之所必然而云戶則坐者特取其正祭時以反申之。

學記

九年知類通達強立而不反謂之大成

按王制司徒之簡於鄉學樂正之簡於國學雖未明著其時之久近大約皆以九年爲斷以此經比年入學中年考校計之則於鄉學歷四不變而適符其期以七年小成九年大成計之則於國學歷兩不變而適符其期是不肖者於九年而可屏之不齒其賢者於九年而亦可責其有成矣蓋當八歲入家塾時詩書六藝旣已肄業及之至十五入大學則由離經而進於敬業博習論學其精詳於義理者卽所以爲知類之基也由辨志而進於樂羣親師取友其陶鎔乎德性者卽所以爲強立之本也至於理無不通德能不反則出而應鄉大夫之賓興司馬之辨論其上者爲公卿之選次亦不失爲比閭族黨之師此先王所以成天下之材去後世記誦詞章之學遠矣

皮弁祭菜示敬道也

道者先聖先師所遞傳之統緒學者入而修身出而治民莫不由之故於入學之始有司爲之承祭以顯示其所宗皮弁取其色之白也菜取其物之潔也非先潔白其心無以爲敬卽無以遜順其居業而收斂其威儀道安在乎此自古聖賢教人入德之方莫不以敬爲本

不學雜服不能安禮

服而曰雜非特六冕九章之大者以繫諸帶則有韃紳以象其裳則有屨鳥臨戎則有甲胄居喪則有衰麻以及車馬旌旛之屬事有宜適物有節文皆禮之粗而精者寓焉不於退息時學之則將見其物而不知其名聞其名而不知其義適然用之而服與心不相習容與服不相稱禮法森嚴之場不且手足無所

措乎且服之附躬直以閑性孔子曰衰絰苴杖者志不存乎樂黼黻袞冕者容不豐慢誠講求其所以不樂不穀者何故而能通於先王制作之原其於禮也安矣

禁於未發之謂豫

心之所發無端待其既失而救之則禁於此而潰於彼不勝防也古者禮以防德於居處語默之間先爲之制外養中則本源清而情欲無自生矣易曰童牛之牿豫也知此者可以爲師并可以爲君開而弗達則思

此孔子所謂舉一隅孟子所謂引而不發者也蓋開其端而不竟其說使學者或苦爲難而教之誘於前者有緒使學者或視爲易而理之蘊於中者無窮是以不思而不能略思而不容已迨其深思而旣得之則理與心融固與耳食者迥殊矣

當其爲師則弗臣也

師之尊等於尸天子事尸如事父則事師亦以父道承之武王之於呂尚桓公之於管仲學焉而後臣故或尊之曰尚父或尊之曰仲父皆示以不敢臣之意也古者延尸入室居必主奧師席亦然故孔疏以爲師東面弟子西面天子入學承師問道固未有北面以詔之者而鄭註據尚書之進丹書以爲武王東面尚父西面有異於孔疏者豈以王庭之位宜與太學殊歟抑亦黃帝顓頊之道不外敬勝一言將終身奉以爲主故特居己於賓位並不敢以尋常師弟之禮待之也

良治之子必學爲裘良弓之子必學爲箕

見必囿於一隅思不周於萬類非學也學當深造之餘必有引伸而觸長者治與裘異工弓與箕異器但其理可通遂使父兄之世業在彼子弟之能事及此故君子之於學優而柔之饜而飫之及其事至物來雖平生耳目所未習無不舉措裕如者孟子所謂取之左右逢其源也

樂記

變成方謂之音

鄭註方猶文章蓋取下經聲成文之義也顧彼第言成文謂音而此以應而生變變而成方自聲及音詳言之者以彼所謂音者樂也而此則指人之詩歌言之詩者樂之本詩正則樂正詩淫則樂亦淫故人之心既感於物而形爲聲則高下疾徐必有自然之變以盡其情尤貴有當然之方以立其節否則喜怒哀樂變態無窮不嚴防於其始及比音成樂則流蕩不可爲矣經解曰隆禮由禮謂之有方之士不隆禮不由禮謂之無方之民註云方者道也先王原樂之所由生而欲先返人心於道蓋隱有禮寓其間矣故下言慎其所以感人必首禮以道其志

亡國之音哀以思

亡國之音不必求諸桑間濮上也卽取三百篇之變者觀之如兔爰之尚寐無覺若華之不如無生哀莫甚焉匪風之顧瞻周道下泉之寤歎京師思已極矣其詩如此則其樂必有志微噍殺聞之而感然以悲

者當季札觀樂之時，棺已入鄭，而曹去社，鬼謀亡之世，亦不遠矣。自檜無譏，蓋知其政煩民困，滅亡日也。後人顧謂國之興衰，於樂無與，而欲奏玉樹伴侶之歌，以驗其心之哀樂，何也？

是故先王之制禮樂人爲之節

此承上文好惡無節而言之。先王知人之貴於物也，而懼其化於物，故探人性之中和，而制爲禮樂，以節其好惡。喪紀之無數也，安樂之多荒也，男女之有欲也，交際之易瀆也，而惟禮樂有以防之。防其過，固爲節，卽防其不及，而有所益，必有所損，亦謂之節。故節不獨著於禮之嚴，亦自存於樂之和。管子曰：「節怒莫若樂，節樂莫若禮。」得所節而人乃無失其爲人之道矣。

樂由中出故靜禮自外作故文大樂必易大禮必簡

樂之和普乎外，而實根於性之仁。其優柔乎中，使人聆之而欲心忘，躁心釋焉，故曰靜也。禮之敬存於中，而實適乎事之義。其周旋裼襲，使人見之而威可畏，儀可象焉，故曰文也。惟中出而靜，則第率其性之自然者以發之，而無所留難。與乾之易知何異？惟外作而文，則第循其事之當然者以行之，而無所煩苦。與坤之簡能何殊？知其必易必簡，則凡禮樂之見用於朝野者，必反求諸吾心之仁義，又何有勝則流勝，則離之患耶？

節故祀天祭地

禮之所該無窮，大而君臣父子，小而事物細微，莫不爲之限節。而其高卑上下之有秩者，尤著於天地，故

舉聖人所制祭祀之禮以明之意本不在報生成之功也。圜丘方澤異其地。燔柴瘞埋異其儀。六變八變異其樂。一承祭而其禮已截然而不可踰。則凡天地間羣物有別可知矣。觀於此而知昊天成命之詩。小序以爲合祭天地者非也。

如此則四海之內合敬同愛矣。

敬由節而生。愛以和而篤。其性本於天地。而功成於禮樂。故夫精審於制作之間。相合而有助者。禮樂也。流行於化育之際。曲體而不遺者。鬼神也。聖人德位兼隆。本幽治明。以明贊幽。建中和之極。爲天地消其乖戾之氣。故民之生於其間者。稟鬼神之靈。知能不待於學。廬遊禮樂之化。性情復得所陶鎔。夫是以合敬同愛。而仁風洋溢海內也。

論倫無患

靈臺詩於論鼓鐘箋。謂論之言倫。則論倫一耳。然專言論則字可假借。並言倫則義有異同。且對下文中正觀之尤宜一字一義。按毛於詩傳謂論思也。蓋謂樂之本於德者深足思。而宜加之論說也。鄭於此註謂倫類也。蓋謂樂之比於音者各有類。而無乖其等倫也。子夏曰。君子於是語。於是道古。使樂終而不足論。必有淫溺害德之患矣。帝舜命夔曰。八音克諧。無相奪倫。使樂行而倫不清。則必有宮商迭陵之患矣。究之大樂同和。其患必不至此。故特舉論倫而爲之揭其本情焉。

樂者敦和率神而從天。禮者別宜居鬼而從地。

神曰率。鬼曰居。疏謂居亦率循之義。變文爾。非也。率者順而達之。陽之伸也。天之所以生物者也。居者萃而凝之。陰之屈也。地之所以成物者也。然生物爲天之和。而非以樂之鼓盪者敦之。則無以從天而宣其氣。成物爲地之宜。而非以禮之秩序者別之。則無以從地而析其形。此天地有資於禮樂。而聖人制作之所不容已也。

樂著太始禮居成物

此借易之乾坤。以明天地禮樂相須之義。太始者。氣之未形者也。未形則微妙難窺。而惟樂有以宣之。使之充塞而無間。成物者。質之各具者也。各具則散殊無紀。而惟禮有以定之。使之得所而不遷。其不言知何也。知者乾之所爲也。乾知之而樂著之。始與俱始。无方无體之中。可挹其太和之神焉。其不言作何也。作者坤之所爲也。坤作之而禮居之。成必終成。一名一物之微。皆得其位置之序焉。下更以其動靜之對待流行者言之。而禮樂之爲功於天地。卽聖人之盡性以贊化育者。不外此矣。

故其治民勞者其舞行綴遠其治民逸者其舞行綴短

天子八佾。諸侯六佾。舞之人有定。則位之綴亦有定。宜無遠近之殊。其有殊者。固於常數之外。特加恩賞以獎之者也。當舜之時。艱鮮之奏。雜以憇遷。民多奔走於衣食矣。故欲觀諸侯之德教。必以五穀爲徵。尤以民之勞逸爲斷。民勞則綴遠。民逸則綴短。舞與其治相稱也。按王制。天子賜諸侯樂。則以柷將之。賜伯子男樂。則以鞞將之。疏謂柷節一曲之始。其事寬。鞞節一唱之終。其事狹。同一賜樂。而所執以將命之器。

微有尊卑則此亦微示優劣以勉其益勤於民而已矣。

大章章之也咸池備矣

大章、堯樂、咸池、黃帝樂、大司樂教六舞，以黃帝爲先，而此乃次於堯下。按路史有云：堯制咸池之舞，爲經首之詩，以享上帝。命之曰大咸。周禮六舞無堯樂，而註卽以大咸當之。然則黃帝之樂歷顓頊、高辛至堯始增修之，以用享而大章之所以章明俊德者必合咸池而始爲大備也。董子曰：王者未作樂之時，乃用先代之樂宜於今者，而以深入教化於民，則堯用咸池古今帝王之常法，亦何待取證於漢之禮樂志乎？

壹獻之禮賓主百拜終日飲酒而不得醉焉

黨正祭蜡而飲，始則以禮，終則如狂。一日之澤爲農民也，欲觀禮於飲食燕樂之間，必由士始。傳云：鄭伯享趙孟，趙孟欲壹獻而賦瓠葉，則壹獻固士禮之至簡者。然卽儀禮鄉飲酒觀之，庠門迎賓以拜始，陔夏送賓以拜終，其間洗爵送爵則拜，祭酒啐酒則拜，主獻賓酢以至司正相旅，衆賓受酬，約計其拜，不啻百焉。非記所謂節文終途者歟？不特此也。士冠而主人醴賓以壹獻之禮，士昏而舅姑饗婦以壹獻之禮，無不以拜明虔。豈若勞農者之意主於飲乎？固不必監史之立其旁，而以醉伐德者鮮矣。

制之禮義

本性情，稽度數，樂之大端舉矣。及其發於聲音，猶恐其大過乎宮，細過乎羽，則君民事物之亂當必有以節之。節之者禮之中也。猶恐其寃者不容，則清濁高下之乖當必有以正之。正之者義之宜也。

此不過樂中自具之倫序聖人從心制之則以爲禮義也

廣其節奏省其文采

曲之一終曰節樂之更端曰奏先王廣人所學欲其自始作以至九成按律循聲優游饌飫以博其趣也節奏合以成文而采則文之過其實者本漢書頌師古註故必從而省之使適於華實之中則不至以煩手淫心慆其心耳而德之稟於天者愈敦於厚矣此樂之爲教所以游人於廣大之途而歸之於粹精之城故孔子曰成於樂

然後發以聲音而文以琴瑟動以干戚飾以羽旄從以簫管

上文言由順正以行其義至德備矣則可本吾心之順氣著天地之正聲而樂興焉先從堂上言之聲音者謂工歌也歌配以絃則有琴瑟大傳曰大琴練絃達越大瑟朱絃達越取其唱嘆有遺音也旣歌以咏其聲亦舞以動其容朱干玉戚武舞也執籥秉翟文舞也文舞兼言旄者以備樂師小舞也明堂位曰升歌清廟下管象是管以配舞堂下之樂也虞書言下管而終及簫傳謂言簫見細器之備故有瞽詩亦於旣備乃奏之下而終舉簫管以著其肅雌和鳴也顧樂器末也非有積於中而徒求諸外其能和天地而理萬物乎故發者發其德也文者文其德也曰動曰飾曰從義亦猶是

百度得數而有常

度生於律數生於度和黃鍾管長九寸者度也九九八十一分者數也而氣行於子月子當天地人未分

之初其數爲一漢律歷志云太極元氣函三爲一由一而三之三三而積之歷十二辰之數得十有七萬七千一百四十七而律呂全五數備矣推之所以齊七政以授人時立百物以利民用者其數可紀故其度有常而莫不由黃鍾之一衍之以至無窮故曰黃鍾爲萬事根本

禮樂僨天地之情達神明之德降興上下之神而凝是精粗之體領父子君臣之節

天地無情而以立本不變至誠無僞者爲情其命之於穆不已者神明之德也其氣之綱緼無間者上下之神也德藏於密而微不可見情之未發者也精也神妙乎物而顯有可憑情之已發者也粗也聖人依象天地之情制爲禮樂以達其德而爲之著始居成以降興其神而使之上行下濟則精而形上之道與粗而形下之器皆凝合於聖人之心故能以輔相天地者統領羣倫使凡有君臣父子者知其爲生人之本而不可變達吾心之誠而不容僞禮以履之樂以樂之共勉爲仁敬孝慈以曲赴乎其節焉

治亂以相

上文言會守拊鼓堂上之樂此言治亂以相堂下之樂拊與相自不得合而一之而鄭顧謂相卽拊者按周禮自大司樂以贊司干言樂器詳矣無一及相鄭註拊形如鼓以韋爲之著之以糠馬氏通考謂相狀如鼙韋表糠裏是二者形制俱同此鄭所以目爲一器也又按爾雅和樂謂之節疏云節者樂器謂相也是一物而三名意其用以倡樂者爲拊而用以節樂者別名爲相歟

然後聖人作爲鼙鼓控揭壠篋

土鼓葦籥樂之始也。士者沖氣所出。籥者中聲所通。太音聲希。亦以表其淳德而已。未足宣天地之和也。中古聖人有作。因而增之。革則有鼙鼓。木則有空腸。燒土爲壠。截竹爲篪。樂器較多於舊矣。然而革之音主於一木。之音傷於直壠之音。囂而濁篪之音清而悲。豈聖人心力不能極八音之華美哉。而祇取於質素者。於制器調律之內。寓反本復古之心。所以絕遠於淫溺煩驕之害德也。

久立於綴以待諸侯之至也

始之總千而山立以待者。待周有二之諸侯也。此之復綴而久立以待者。待殷三千之諸侯也。武王牧野之誓曰。逖矣西士之人。則所稱友邦冢君者。不過庸蜀羌髣微盧彭濮而已。若薊在燕。祝在青。杞陳宋在豫。地皆近商。其敢背紂而先至乎。不至而古先帝王之裔。或在畎畝。或守故封。何由悉知。而沛新恩以重錫之。且克商反政。將與天下偃武脩文。而所以教孝教弟教臣。又何由使遐邇之人。得以觀法。故凡諸侯之未前會於孟津者。今不能不待其至也。孔疏謂待以伐殷。則與始之備戒已久。病不得衆者。言重而意複矣。

左射狸首右射騶虞

鄭註。左爲東學。右爲西學。疏謂東序在東郊。虞庠在西郊。以東西別學之大小。則豈諸侯習射於大學。天子反習射於小學乎。說者謂左射卽下射。右射卽上射。殷人尊右。此時猶用殷禮故也。然下文明云。周道四達。安得擇士郊宮而獨從殷乎。按山陰陸氏謂天子立四學。并其中學而五。皆於一處並建。左爲東序。

右爲瞽宗皆大學也若然則狸首之詩所以爲諸侯射節者不以歌於東學爲僭騶虞之詩所以爲天子射節者亦不以歌於西學爲替矣

使其曲直繁瘠廉肉節奏足以感動人之善心而已矣

曲謂紆迴不迫直謂剛勁不撓繁謂雜而成文瘠謂簡而有要廉乃皦如之義肉爲圓美之神皆樂之聲也聲閔而止曰節進而作曰奏節奏總上文樂之終始言之六者義相反而相成蓋調劑以得其中和故其聲足樂而不流也不如此則不能感動人之善心而以道從欲以情決性甚非先王所以立樂之意矣

明乎商之音者臨事而屢斷明乎齊之音者見利而讓

宋晉燕女溺志齊音教僻驕志祭祀所弗用者而師乙乃取其能斷與讓豈其自作爲歌詩有以惑人之志而所識古帝王之遺聲固足以成人勇義之德歟按三百篇商有頌而無風齊有風而皆變故商之被諸民俗者不可攷而齊自虞韶以外古樂所存無明證也今但就二國之詩論之商頌簡嚴即武湯之載旆秉鉞高宗之伐楚哀荆其勇斷可知矣而季札於魯之歌齊美其浹浹大風宏大者不見小利則雖自哀公衰變以後而三代尚義之盛德猶有未泯於人心者歟在歌之者明以辨之

讀禮記卷八

雜記

大夫以布爲轎

轎所以覆柩上下之通名也。但轎之義取於舊，所以染成赤色者，諸侯縕布爲帷，則必以赤布爲轎配之。大夫布不用赤，士惟用白布而已。考殯車之轎與葬車之荒略同。喪大記於諸侯言黼荒，大夫言畫荒。於士則言布帷布荒。鄭註布帷布荒者白布也。君大夫加文章焉，是同質而特異其采耳。而此下經云士轎葦席以爲屋，蒲席以爲裳帷，與大記異，將何從焉？按儀禮既夕商祝飾柩，鄭註以爲牆有布帷，柳有布荒，則士轎當以大記爲準。

大夫次於公館以終喪

大夫遇君之喪，居倚廬，練而居翼室，次於公館以終喪禮也。或疑鄭註三年無歸，似有未安，不知鄭第論其禮之常，未及其變也。按曾子問君薨既殯而有父母之喪，歸居於家，有殷事則之君所，未殯而有父母之喪，則歸殯而反君所有殷事則歸。君子不奪人親，豈肯以君公之尊而使臣子不得治其私喪哉？由是推之，倘父母有疾，歸視醫藥，朝夕則往哭於殯宮，宿於公館，亦情義之兼盡者。

薦馬者哭踊出乃包奠而讀書

儀禮既夕薦馬之節凡三其薦於祖奠遺奠者不言哭踊惟柩始朝廟設遷祖奠之時乃言馬入門哭成踊此記哭踊而卽以包奠讀書繼之者蓋明三薦俱哭也或欲置哭踊於薦馬者之上或欲置於出之下置於其下則是馬入而無觸於目馬去而反哀於心也斷非人情卽置於其上亦無以見哭踊之節適當馬之甫入薦而欲出之候也包奠者苞牲以爲遺車也讀書者讀贈以告死者也皆在薦馬之後馬旣薦而出自道車從而駕之以視初薦之時行期愈迫哀痛彌深故此哭成踊者專爲馬也非爲奠也而或連下文徹者入踊如初之語以釋此踊失之矣

有三年之練冠則以大功之麻易之

三年之喪旣練則久受之以葛帶矣而顧以大功之麻帶易之者以練除首絰前喪之哀略殺而後喪之痛方新故暫爲之變服迨後喪旣葬自反服其前喪之服也大功服有三等而孔疏必以降服爲言者固以正衰八升冠十升義衰九升冠十一升較細於三年之練衰故不得易耳然大功降衰七升與斬衰之受服六升齊衰之受服七升其精粗亦無大異而經文概言三年未嘗別之爲父爲母鄭註亦概言大功未嘗定之爲殤固不如賀氏之說謂三等大功皆得易之重新喪也

其始麻散帶經

麻卽絰也散帶不絰小斂以前之飾也及大斂旣殯而後絰之按奔喪禮自齊衰以下入門左中庭北面哭盡哀免麻於序東今於聞喪之始而卽爲之服麻者蓋迫於公私之事未能急奔而自揣其歸期之必

在麻帶經日數後也。故爲位變服。三日五哭。以象其始死以至成服之禮。鄭註所謂與居家同也。

稽頰者其贈也拜

贈謂衣衾錢財之屬。所以助喪事者也。儀禮有襚者。則將命賓入中庭。北面致命。主人拜稽頰。父沒而主適妻之喪。應與士喪禮同。故謂之稽頰者。爲其當稽頰也。但以母在而禮屈於尊。不得盡其私。則雖有厚贈。當稽頰者。亦第拜之而已。如謂贈得稽頰。是視此贈有逾於吾之所以事母者也。烏乎可。

先路與襃衣不以襚

鄭釋。顧命大輅爲玉輅。先輅爲金輅。玉輅以祀。而封侯國則金輅爲先也。襃衣者。鄭註所謂始命爲諸侯。或朝覲得加賜者。故曰襃猶進也。下經公襲九稱。以袞冕親身。而襃衣最在外。蓋奉天子之賜。以爲尊榮。較先輅尤重。倘以二者遺人爲送死之用。則非所以尊王命矣。

士三踊

諸侯大夫禮亡。七踊五踊無經可考。而士之喪禮猶存。觀其自死至殯。言稽頰成踊者一君弔也。言丈夫踊者二。小斂奠也。言卽位踊復位踊者各一。成經及卒殯也。言踊無算者四。與踊如初者一。則馮尸而踊。使堂而踊。遷戶而踊。斂棺而踊。蓋塗而踊。皆哀痛慘怛。發於情所不能禁者。而儀禮尙未言始死之踊。殆不啼十餘踊矣。詎止於三。蓋哀至則哭踊亦隨之。其何常數之有。則此之七踊五踊三踊。誠不以限孝子之心。亦以休不肖者之斷不可不及乎此也。按喪大記。鋪絞紓踊以至斂。絞冷踊。其節有七。然祇首得大斂之時。恐未足當公之七踊也。

宰舉璧與圭宰夫舉榦

諸侯以司徒兼冢宰。宰固上卿式君事者。宰夫其屬也。或以宰爲小宰。非卿。吾據聘禮論之。聘禮君與卿圖事。遂命使者戒上介下云。宰命司馬戒衆介司馬亦卿。小宰下大夫安得命之。又云。宰書幣。命宰夫官具。宰告備於君。宰之爲上卿明甚。及使者至鄰國聘。則公側授宰玉享。則公側授宰幣。迨士介行覲之時。宰夫受幣於中庭以東。則此以宰舉圭璧。宰夫舉榦。雖器幣與聘享殊。而其受之以尊卑爲差次者。禮無殊也。使謂春秋無稱上卿爲宰者。顧不據儀禮而據左氏傳。何歟。

上客臨曰。寡君有宗廟之事。不得承事使一介老某相執綺。

鄭、孔以此臨比於聘之私覲。是也。上文寡君使某如何不淑。及使某舍。使某襚。使某賄。皆爲君弔也。而公事既畢。使者欲自伸其哭踊之情。故托言執綺。若將留以送葬者。然蓋爲己弔也。爲君弔。故位在門西。客禮也。爲己弔。故入自門右。臣禮也。雖固辭不獲。終從客禮。亦猶聘賓之請覲。始入門右。而終入門左也。以其屢稱君命。遂疑臨亦爲公。不知臣統於君臣之禮。皆君之禮。故稱君命者歸美於上之辭耳。一介老者。猶云一個臣耳。傳云。一介行李杜註。獨使也。孔疏以介爲擯介之介。謂謙言爲介者。祇有一人。則吳語一介嫡男。一介嫡女。何以稱焉。上文相者出告。皆曰孤某須矣。此節相者反命。則曰孤須矣。稱名者。答其君之辭也。不稱名。答其臣之辭也。集說既從孔以臨爲私禮。而於上節致贈之時。但云孤須。刪去某字。且引陸氏以爲諸本有某字者。非亦謬甚矣。

如三年之喪則既穎其練祥皆行

期而練再期而祥祭之變而從吉者也今以前喪遭後喪而均爲三年其哀正同如未穎而遽以祭除服是忍於後喪也如旣穎而不以祭存親是忍於前喪也小記曰三年而後葬者必再祭則練祥必不可廢但不當行之於戶柩尙存耳或有疑於以穎代葛之說而訓穎爲練謂旣虞變麻之哀未殺也然使後喪適值前喪將練之時而復俟後喪之練是再期而練也練於虞後已爲奪於後喪而追舉之又可緩乎且練祥吉祭暫爲釋服卒事而仍爲後喪服其受服則前後各盡其情無所偏於厚薄矣奚必以練易穎

王父死未練祥而孫又死猶是祔於王父也

祔必以班王父死則當祔於高祖已之高祖王父之王父也今孫死而祔王父從其昭穆禮無異於王父之祔高祖故曰猶是其云未練祥者明無廟也無廟何祔左氏傳曰凡君薨卒哭而祔祔而作主特祀於主杜註戶柩已遠孝子思慕故造木主立几筵特用喪禮祭祀於寢則孫死卽於是乎祔之

小祥之祭主人之醉也嗜之衆賓兄弟則皆啐之大祥主人啐之衆賓兄弟皆飲之可也

此言助喪祭者當視主人之哀節以爲飲酬之禮也小祥雖與虞祔有異而要經杖履猶存見之者當爲惻然故主人受賓酢疇之而已而賓受主獻何可卒爵大祥主人啐之則衆賓兄弟舉奠爵以行酬於禮爲可而鄭以爲無無算爵猶與特性不同是於變吉中而常存悲痛之心也故魯孝公之於大祥奠酬弗舉其失禮也小而昭公之練而旅酬其害於禮也大矣

廬哭室之中不與人坐焉

斬衰居廬疏衰居哭室是人子思親之所也思則哀哀則哭恍焉惚焉無可爲外人喻者故已不出人亦不入不欲間其憂也曲禮曰有喪者專席而坐呂氏謂不與人共坐是也

當袒大夫至雖當踊絕踊而拜之反改成踊乃襲於士旣事成踊襲而後拜之不改成踊

袒對下文兩襲字言之爲大斂事變也當袒而至或大夫或士不必偕也前小斂旣畢主人拜賓大夫特拜士旅之此亦旣事而後拜於大夫則當斂棺加蓋之時絕踊而出於士則俟卒塗置銘之餘成踊而出惟其絕踊則必改成踊而襲在拜後惟其成踊則不反成踊而襲在拜前此一經專明大斂拜賓之事與士喪禮正同但喪禮言有大夫後至而未嘗及士顧能知拜士之不等於尊大夫者卽於小斂之拜決之如有服而將往哭之則服其服而往

三年之喪不弔而與死者有服則往哭之前經云有殯聞外喪哭之他室又云卒奠出改服卽位哭之者恩也必改服者義也檀弓聞遠兄弟之喪雖總必往總服之輕者也暫釋己之重服而服彼之輕服亦以往哭之恩專主於新死者則服必稱其恩而後哭非虛也故曰君子禮以飾情

王父母兄弟世父叔父姑姊妹子與父同諱

鄭註天子諸侯諱羣祖疏謂天子七廟諸侯五廟故諱羣祖以次差之則大夫三廟諱不及高適士二廟諱不及曾故記言卒哭而諱自王父母始然此非己之王父母也己之王父母乃父之父母諱何待言惟

父之王父母。以及世父叔父。兄弟姑姊妹。皆與父有齊衰之親。父爲之諱。子亦不敢斥言其名。孔疏謂父之王父母。於己爲曾祖父母。禮不宜諱。正因諱不及曾之義。未可執天子諸侯禮而疑其說之非也。曲禮逮事父母。則諱王父母。不逮事父母。則不諱王父母。正謂爲王父母。諱其所諱。除父之兄弟姊妹爲己所當諱者。而於父之王父母。世父叔父及姑等。俱從而諱之。而孔專指王父母之身。遂謂其不合於士而屬之庶人。此則疏之泥也。

內亂不與焉

內亂如鄭伯有。子哲之爭。皆召子產。子產曰。兄弟而及此。吾從天所與。蓋不欲預其事也。然使貪亂無厭。禍將及君。豈得坐視其間。如韓厥之辭書。偃而曰。焉用厥乎。其不與者。自度其力不能討。暫避之而徐圖之。故子產得操政柄。遂誅子哲。而鄭國安。使當時輕身赴難。倖而成天也。否則如仇牧之見殺於宋。萬叔仲惠伯之見殺於襄仲。於國事又何濟焉。

圭公九寸侯伯七寸子男五寸

此明五等之瑞。而言圭不言璧。下云藻三采六等。祇有公侯之三采三就。而不及子男之二采再就。故鄭以爲作此記者失之。山陰陸氏以子男朝用璧。聘類用圭。謂鄭註誤非也。按本文所謂九寸七寸五寸者。皆所以朝天子。不關聘類。典瑞有云。瑑圭璋璧琮以類聘。故儀禮聘君用圭。享以璧。聘夫人用璋。享以琮。記云。凡四器者。惟其所寶。以聘可也。此據公侯伯之禮則然。若子男則聘用璧琮。享用琥璜。蓋聘類之玉。

皆下其朝王一等。如公執桓圭九寸。聘用豫圭八寸。子男朝惟執璧。安得聘反用圭乎。陸說殊無據也。或謂言圭兼公侯伯下文玉也。該有子男蒲縠在內。其義可通。然亦未足以難鄭。

喪大記

廢床徹襲衣加新衣

廢床而寢之地。亦猶升屋而號。行禱五祀。人子冀幸其生耳。而當疾病既革。則埽堂徹樂。凡所以慎終之儀。不可不備。故爲之徹襲衣。易新衣。君子正其衣冠。正而生。不敢不正而斂。亦曾子易簀。子路結纓之心。又按檀弓。季康子之母死。敬姜曰。將有四方之賓來。襲衣何爲陳于斯。則鄭孔客未候問之說。義應並存。

男子不死于婦人之手

男女有別。禮之大經。雖死不變。僖公薨于小寢。春秋譏之。爲其近婦人也。諸侯有疾。僕人師扶右。射人師扶左。薨以是舉。皆其平生贊正服位之人。下至於士。亦有侍御僕從。故其喪也。御者四人。抗衾而浴。其母之喪。則內御者浴。男女不相爲役也。按下經。士之喪。胥爲侍士。是斂。鄭讀胥爲祝。卽儀禮商祝也。商祝亦士。則知其將死而體一人者。莫非士也。慎終之道。亦嚴矣哉。

子坐於東方。卿大夫父兄子姓立於東方

君薨稱子。正其爲世子也。東者主人之位。坐於東方。承統亦以主喪也。在禮未成服以前。升降不由阼階。然出拜國賓。固以行自西者。明人子之不忍死親。入統諸臣。必以位在東者。見先君之幸有主後。且諸侯

繼世得臣其諸父昆弟子坐而卿大夫父兄子姓並立其後尊卑之位定矣其坐于西方者不言主婦曰夫人謂其母也母雖尊而不得居主位內外統于子也此卽尙書願命延入翼室恤宅宗之義蓋一國宗之矣

士之喪主人父兄子姓皆坐于東方主婦姑姊妹子姓皆坐于西方

以東西別其哭位者亦女統于男之義按士喪禮主人坐于床東衆主人在其後西面婦人俠床東面上言坐而下不言立則父兄姑姊妹以及男女子姓皆坐可知正與此經義合而旣夕記云室中唯主人主婦坐兄弟有命夫命婦在焉亦坐推其意若非命夫命婦則皆立也不惟與此經不合亦與士喪禮顯有牴牾禮朝廷論爵居鄉以齒故庶子正內朝之位雖有三命不踰父兄大夫士非君安有主人主婦坐而父兄姑姊妹皆立者乎故論士喪之哭位當以此經爲正而上文大夫之喪所謂命夫命婦則坐無則皆立者亦非也殆記禮者雜述所聞而未免擇之不精矣

弔者襲裘加武帶絰

按玉藻居冠屬武則禮冠固有與武不相屬者然武爲冠卷著冠則必施武未有先時無武至弔而加之者此所謂加加經非加武也子游襲裘帶絰檀弓未言及武而經必加于武則言經卽武可知但文有詳略耳而賀氏云加素弁于吉冠之武集說從之考周官王之弁經弁而加環經謂加經于弁也今如集說是用吉冠之武而加素弁于其上又不見經之所在亦舛矣

大夫於君所則輯杖

杖者病也。君杖而大夫輯，不敢以病弛其敬也。上文寢門之外杖，寢門之內輯，子與大夫同，而復別之爲君所者，入殯宮則先君以臨之，子臣爲一體也。居倚廬則適嗣以主之，君臣無二尊也。故自其思慕乎親者言之，則謂之子；而自其統攝乎臣者言之，則必稱之曰君。

大夫有君命則去杖

上言主人而此言大夫者，非一人也。古者大夫不世爵，使以德，爵以功。當其居喪之時，尙未敢必爲士，況大夫乎？故特起大夫之文，言其實爲大夫，而遭父母之喪，有君命則去杖，亦猶諸侯世子之尊王命也。然則大夫之子爲主人者，將奈何？假士禮以行之可也。

甸人取所徹廟之西北扉薪用爨

甸人屬於甸師，本給薪蒸之役。今必取復魄人所徹之扉薪以用之者，蓋升屋而號，惟士卽於所死之宮。若諸侯復于小寢、大寢、小祖、大祖，則扉薪固有取諸祖廟者，鬼神之物，非可爨用。故然竈以煮稷梁而供尸沐，亦猶重既虞而埋之，杖旣祥而隱弃之，皆不敢使人慢喪之義。尊廟亦以尊尸也。孔疏以廟爲正寢，推其意，以將用爲殯宮，故假神以名之。此於士之喪禮得矣。抑思經所謂廟者，兼有諸侯大夫在乎。

絞一幅爲三不辟

上文言小斂之絞縮一橫三，大斂之絞縮三橫五，舉其數未詳其制，故特申言之。舊說專指大斂之絞，則

一副爲三不辟。祇是縮者未足以該橫者。或曰此總言大小斂絞皆用布之全幅。析其兩頭爲三而留其中央不擘。其說較爲明捷。蓋必不擘其中而後絞之。藉于下者不移。必析其末而後絞之。束于外者始固。理應如此。且小斂衣十九稱大斂。君百稱大夫五十稱士三十稱。祭服不在算。大夫士兼有襚爲衣多矣。又以兩衾裹其上下。使之正方而後束之以絞。脫非橫縮皆用全幅。則不能周而舉之。何以奉尸于棺乎。

父兄堂下北面

大斂於阼。其陳衣布席鋪絞衾。占地必多。故子位于序端。卿大夫位于堂廉檻西。廉近南露。其外更無餘地。使父兄立于檻西之西。則去尸爲遠。無以北面而視斂且嚮君也。故其位在堂下。以東爲尙。前此室中之哭位。父兄立于卿大夫之後。陸氏以爲國事先君臣也。今亦猶是義耳。豈以父兄不仕爲賤而下之。

馮尸不當君所

馮尸必當心。而君既坐而撫之。則是君所也。使餘人復當其所。則是上干于君也。大夫士何敢然。按士喪禮。君來視斂。主人降中庭。君升。主人馮尸。命主婦馮尸。與此記大夫之喪俱同。故記者卽取士喪禮馮尸。不當君所之文。以見大夫亦無異也。蓋升之使馮者。不欲奪主人悲哀之心。而馮必異所者。不敢忘上下尊卑之分。君臣之間。雖當衰絰哭踊。而猶有禮焉。

樂作矣故也

皇氏以樂作總釋祥禫之無哭。其說是也。祥之日。鼓素琴。琴卽樂也。凡音以絲爲君。絲以琴爲君。按其中

暉上下已備律呂而諸宮商豈得謂非樂耶雜記言妻有服不舉樂于其側使非琴瑟安能於妻之側奏之故下云大功至辟琴瑟小功至不絕樂正謂樂卽琴瑟耳魯人朝祥暮歌子路笑之孔子旣祥五日彈琴而不成聲十日而成笙歌是琴亦樂歌亦樂豈必如孔疏八音懸于庭而後謂之樂哉況本文祇言樂不言琴則其以琴爲樂而總釋祥禪明矣

主人具殷奠之禮

殷奠者異于朝夕常奠也牲牢豆籩禮如大斂註謂榮君之來故具以待之而義未盡也蓋君於大夫之喪當視大斂於士有賜亦視大斂乃爲事故所牽旣殯而至在主人雖當成服之後在君實爲至哀之初入對殯宮如見尸柩按士喪禮蓋棺卒塗君命反奠主人立中庭奠升自西階君要節而踊主人從踊今弔雖後時而設大斂之奠使君得以成禮如初喪者然故主人免絰深衣復其殯服皆曲禮君心故也至若君來不戒旣退而設大奠以告死者則專以君弔爲榮矣

士蓋不用漆二粧二束

士喪禮掘肆見衽衽所以連其蓋與棺之際而以革束之儀禮雖不言其數度非二不足以束之使堅也君蓋用漆與大夫同而以衽束之三與二別之大夫衽束與士同而以蓋之用漆不用漆別之其降殺甚明則知縮二橫三檀弓專爲天子言之也與此記所稱君者異

比出宮御柩用功布

自宮以內寢廟在焉春秋奉祀之所其地應無高下傾虧功布御柩正爲門外至墓導引其行經所謂比出宮者蓋出宮而用之非出宮而不用也鄭見儀禮旣夕將設祖奠則云商祝御柩旣讀贈遣則云商祝執功布及出宮踊襲以後不見商祝遂謂自宮而止竊意商祝所職不過爲引柩執披之人節其抑揚左右宮內如是道上亦如是其義已明故略而不言耳且君用羽葆大夫用茅士用功布尊卑之分旣昭有何嫌忌而去之乎以當用之物而忽去之于需用之時似非情理

讀禮記卷九

祭法

有虞氏禘黃帝而郊嚳祖顓頊而宗堯

虞夏皆出黃帝黃帝孫曰顓頊顓頊生窮蟬歷六世而有舜則舜以顓頊爲始祖而禘黃帝於顓頊之廟於禮爲宜。嚳則元囂之孫於黃帝爲曾孫而顓頊之族子也去舜遠矣乃舜以受唐之天下遂郊配嚳而宗祀堯則知爲人後者爲之子凡以旁支入承正統者不得復顧其私親也由是推之夏后氏旣禘黃帝祖顓頊亦宜郊堯而宗舜彼崇伯鯀與瞽瞍類耳卽謂鯀有障水之功而傳云自幕至於瞽瞍無違命其德豈下於鯀但俱非可以配天者舜無私於瞽瞍則禹亦必無私於鯀而羽淵之神實爲夏郊或其子孫爲之非禹之所敢出也觀其下曰宗禹則不當禹之身明矣

祖文王而宗武王

家語古者祖有功而宗有德謂之祖宗者其廟皆不毀此所謂文武是也孝經宗祀文王於明堂以配上帝此周公特起之義與殷三宗周二室不同而說者執離禘太祖之序以文王爲祖執嚴父配天之言謂成王時當以武王爲宗此大謬也按朱子答或問云周公創法以文王配明堂永爲定例卽后稷配郊以推之其義可知然則祖文宗武當以家語爲斷而韋昭之解國語不可從也

埋少牢於泰昭祭時也

時者天地之氣所遞嬗而成故承祭之壇亦尊爲泰而曰昭者言其神昭然於二十四氣七十二候之間而不爽也月令迎春於東郊迎夏於南郊迎秋於西郊迎冬於北郊皆四時之正祭牲用太牢而五天帝五人帝五人官俱從祀焉茲第封土爲一壇而埋少牢於其下則以愆陽伏陰淒風苦雨之有害於其時因而禳祈之出於暫而不舉於常故禮從其簡也

山林川谷邱陵能出雲爲風雨見怪物皆曰神

天降時雨山川出雲地載神氣風霆留形此山林川谷邱陵之所以生財以供民用者也至若山出器車河出馬圖爲人世之所少見多怪者莫非陰陽不測之妙用故謂之神惟王者本體宏遠能以一心貫幽明之理而爲萬物報生成之功故於郊祭之餘望祀四方而百神無不爲所懷柔也

夏之衰也周弃繼之故祀以爲稷

夏之衰商之興也書序湯勝夏欲遷其社不可作夏社是勾龍仍配后土而獨以弃易農明王者革命創制之義或謂湯有天下七年大旱故欲變置社稷孔於商書疏中力辨其非而此疏復用其說者豈以孟子有此義故取之歟不知孟子所謂變置者不過遷其壇壝新其壝埒如壞廟易椽之制耳何敢以旱乾水溢并其所祀之神而廢置之

冥勤其官而水死

此言冥之以死勤事明殷人所以配郊之義集說謂冥卽玄冥非也按左氏傳蔡墨謂少昊氏有四叔修及熙爲玄冥子產謂金天氏有裔子昧爲玄冥師是其世爲此官也與商之冥何涉路史契之來孫曰冥實喜水功夏后氏命爲司空勤其官而水死商人是郊正合此經之旨以冥例鯀則知所謂障鴻水而殛死者亦以明鯀之當郊石梁王氏謂祀禹非祀鯀誤矣

祭義

故禘有樂而嘗無樂

四時祭皆有樂見於雅頌之歌咏者多矣而禘有樂嘗無樂於郊特牲言之於此又言之殆記者見其陽來陰往義所當然非有殷周已事也或曰此專言大夫士禮特牲少牢皆不用樂而少牢祝辭有曰嘉薦普淖嘏辭有曰宜稼於田玩其語意頗似秋物大成祭品豐厚孝子特伸養道者其爲嘗也歟

祭之日入室僂然必有見乎其位周還出戶肅然必有聞乎其容聲出戶而聽愾然必有聞乎其歎息之聲

此舉一祭之終始爲言故以入室出戶該之特性祝先入主人從西面於戶內卽此八室之時戶猶未入虛位也而如在其上彷彿見之下文所謂致愛則存也自是迎戶門外饋食室中禮成三獻惠及旅酬卽周還也其出戶者特性主人出立於戶外西南是也當其時戶護祝前主人降杳乎其容寂乎其聲而如將聞之下文所謂致慤則著也迨至佐食撤俎敦改設於西北隅扉几筵闔牖戶室虛無人矣而以送往

之心如聞歎息所謂聽於無聲者也其始入也註疏所謂陰厭其終聽也註疏所謂陽厭必兩言出戶者以祭畢而出有祝告利成佐食改饌兩事故重言之儻然者愛也肅然者敬也愴然者哀也一祭而兼三義蓋本其致齋之誠通微合漠故能與神明交而所見所聞俱有可必也

唯聖人爲能饗帝孝子爲能饗親

聖人所以能饗帝者事天如事親也孝子所以能饗親者事親如事天也聖人孝子一心而已饗帝饗親一理而已故下文第言孝子之不怍於戶卽知聖人之無愧於帝

如見親之所愛如欲色然

愛之深則結爲欲欲藏於中色著於外故逸書曰欲色姪然以愉然在生人可察而喻祭者杳矣仰瞻几筵何由使隱微所存顯呈於目乎蓋惟思其所樂思其所嗜以誠通之乃得見之

虛中以治之

坤畫中虛虛則敬敬則神明不擾而思慮能周故祭物以豫而備也魯文公承先君之統而廟壞公索氏以將祭之日而牲亡皆見譏於夫子譏其中不虛而怠氣乘之耳穀梁子曰宮室不設不可以祭衣服不修不可以祭有司一人不備其職不可以祭祭者薦其敬也而曷不思所以自盡乎

孝子如執玉如奉盈洞洞屬屬然如弗勝如將失之
守身如守玉執虛如執盈卽曾子臨深履薄之心也壹舉足而不敢忘父母壹出言而不敢忘父母固舉

孝子之居恆言之。但上經言將祭之時。奉承而進。洞洞屬屬。如弗勝。如將失之。語與此同。則孔疏以執玉奉盈。謂孝子對神容貌敬慎者。未可疑其說之非也。且敬養固所以事親。卽敬享亦所以事親。孝子惟奉此以自終其身耳。曷嘗以父母之存歿而異視之。

周人祭日以朝及闔

鄭註闔爲昏時。劉原父謂日欲出之初。猶逮及闔。當以劉說爲是。按周禮雞人大祭祀夜囁旦以臚百官。註謂夜漏未盡。雞鳴時也。郊特牲。鄉爲田燭。孔疏謂六鄉之民各於田首設燭照路。恐王嚮郊之早。蓋古人敬而事必敏於行。皮弁聽報。固有不遑假寐者。而闔在日出之前。不在日入之候也。灼然可知。或謂以朝及闔。及之爲言至也。劉於及字之義未明。竊意說文及逮也。樂記恐不逮事。註云逮及也。禮器季氏逮闔而祭。與此及闔義同。集說於禮器。釋爲昧爽以前。而於此釋爲日之將落。夫將落是猶未落也。豈可謂闔。

合鬼與神教之至也

氣之靈爲神。魄之靈爲鬼。人自有生以來。心能知覺。卽神之所爲。形能運動。卽鬼之所爲。管子所謂凡物之精。此則爲生。流於天地。藏於胸中。鬼與神無不合也。及魂升魄降。而鬼與神離矣。聖人制爲祭祀。以生人之靈。萃死者之靈。不敗以其升於天者散而無歸。不敢以其降於地者泯然無識。竭情盡慎。使其離者合之。臨之在上。質之在旁。一如其生前之形氣凜凜。此反本復始。聖人所以爲教也。家語曰。合鬼與神而

享之言享而禮從此起矣。

覩以俠鮀

旣夕兩斂醴酒士虞亦兩斂醴酒謂若醴若酒陳以二尊所爲俠也士冠士昏側尊斂醴嘉禮與喪虞異也燕禮大射膳尊與玄酒並陳故公尊瓦太兩也此宗廟饗祀醴齊明水同列俎簋之間故曰覩以俠鮀按鄭註司尊彝云裸用彝齊朝用醴齊饋用盍齊則俠鮀亦爲朝踐之尊豈爲裸鬯之不宜在饋食下哉細玩經義專主報氣報魄言之故取臭之達於陽者屬諸氣取味之達於陰者屬諸魄原不拘拘於行禮之序也故建設朝事之後更不明言饋食其所重固不在此如必牽於其序則郊特牲升首於室亦在殺牲制祭之時何獨疑於俠鮀鬱鬯

君召牛納而視之

牛在芻牧之所將有事於上帝則召養獸之官納而視之旣擇其毛又卜其吉慎之也方氏以召牛爲展牲不知召牛者召之於未養之初展牲者展之於旣養之後春秋宣三年郊牛之口傷成七年驪鼠食郊牛角穀梁所謂日展而知者也蓋旣芻之於滌三月之中謹備其災下文朔月月半皮弁素積以巡牲展道也

樂自順此生刑自反此作

樂者異文合愛者也人而能孝則愛結於心而太和之氣溢於民物頑嚚允若而南風歌舜其著也司徒

掌教而不孝首隸八刑蓋不孝則百行失其本而衆惡叢其身矣君子執玉奉盥不敢一朝失足惟自勉於樂之實亦何畏乎刑之嚴而其心猶競競焉是以樂生於舞蹈而誅且凜於鬼神也

古之道五十不爲甸徒頒禽隆諸長者

小司徒起徒役田與追胥竭作鄉大夫則國中六十野至六十有五皆征之未嘗以五十始衰不從力政也至於蒐狩所獲夏官但云大獸公之小獸私之而已穀梁有云天子與士衆習射於射宮射而中田不得禽則得禽田得禽而射不中則不得禽所以賤勇力而貴仁義未嘗以其年之長也而頒賜獨隆於人然則此記所云或前代之遺法故獨稱爲古之道孔疏以記者生於周之末而以周初爲古非也

八十九十者東行西行者弗敢過西行東行者弗敢過

東行西行謂見八十九十者之途也西行者東行者謂君本所欲之之途也意本欲西而有老者在其東意本欲東而有老者在其西則必迂道趨謁不得背其居而徑去也或謂弗敢過者遇諸途則下車而問勞之其說似爲直捷然老者步履維艱恐無道遇人君之事觀下文欲言政者就之固爲尊賢敬老之心亦知其人之難出故也

示不敢專以尊天也

天生神物聖人則之其變化吉凶雖聖人之所爲而必有天焉以臨其上天者聖人之所尊猶天子者臣民之所尊也易曰官占惟先蔽志朕志先定鬼神其依聖心之神明亦何難於專決而武王誓師則曰朕

夢協朕卜周公大誥則曰寧王惟卜用以征伐大事而聽命於元龜蓋承殷人之俗而以神道恤其心也故曰示不敢專將誰示示天下之臣民也天子尊天而天下之尊天子亦如天矣

祭統

心怵而奉之以禮

非有所愧於其心則禮無自生非有所奉乎其禮則心無自盡致愛致慤者心也比時具物者禮也用此知禮以儀心而凡輕議乎禮以爲人之所設非天之所爲者非也用此知心必依禮而凡過恃其心或致失之於儉與失之於濫者俱非也故曰惟孝子爲能饗親

順於道不逆於倫是之謂畜

蓼莪詩曰拊我畜我畜者父母之所以愛子不宜據緯書庶人曰畜而以畜養其親爲言況記者自明畜義謂順於道不逆於倫繩意道之所該者廣而其事莫大於五倫故曾子以事君不忠朋友不信爲非孝而夫子以妻子好合兄弟旣翕爲順親卽以祭言十倫所列以君臣父子夫婦長幼居其要而貴賤親疎、爵賞政事不過由此推而行之此大倫也卽達道也行道而有得於心斯謂之畜畜則能慎行其身不辱其親而可承祭以繼其孝矣孟子言仰事父母俯畜妻子謂庶民也養親而謂之畜則不敬甚矣故鄭亦訓畜爲順於德教

昆蟲之異草木之實陰陽之物備矣

此爲上文菹醢補言之俎薦三牲簋陳六穀而此則籩豆之實也。上言水草之菹而韭菹筍菹非水也。約言草木而菹盡矣。并籩人棗巢之屬俱該之上言陸產之醢而蠃醢蠶醢非陸也。約言昆蟲而醢盡矣。并內則蜩范之屬俱該之。萬物皆生於天而成於地。犧牲委稷孰非陰陽冲和之氣所結而昆蟲以陽而生陰而藏。草木以陽而榮陰而實。尤其顯者故欲備陰陽之物必極諸此。郊特牲不敢用常夔味而貴多品。所以交於神明者義如是而後盡耳。

夫人薦況水

況卽宗婦所執之盞也。以盞齊稅於清酒故謂之況。周禮盞齊況酌此不云況酌而云況水者註謂凡尊有明水因兼云水耳。然夫人旣不薦明水而必連言之不亦贅乎。郊特牲凡況新之也。延平周氏謂況者以水和之解之和解則新其說爲是。按司尊彝凡酒脩酌註謂凡酒三酒也。脩讀爲滌引曲禮水曰清滌謂以水和酒而酌之三酒既可和以玄酒五齊獨不可和以明水乎。說者必謂明水玄酒設而不用何也。尸亦餕鬼神之餘也。

舊說以朝踐之時薦血腥於鬼神至饋熟時尸乃食之故曰餕其餘然饋熟爲正祭尸雖食舉食黍食哉皆以饗神非餕尸也。不得爲餕特牲少牢皆於禮成尸出之後設對席分簋鉶士二人餕大夫四人餕士不脩尸少牢下篇有司徹則大夫脩尸禮也。其云司宮攝酒乃燄尸俎則其爲餕餘可知。天子諸侯明日燕尸夏曰復胙商曰彤周曰繹繹者尋繹前祭亦取神享之餘詩曰公尸燕飲福祿來成所謂餕也。而方

氏乃以正祭當之。本文不明云餽者祭之末乎。

鋪筵設同几

祭有男尸無女尸。陰統於陽之義。毛公於死則同穴傳云。生在於室。則內外異。死則神合爲一。亦其義也。周禮司几筵。凡喪事設葦席。每敦一几。鄭謂親雖合葬。同時在殯。則異几。以體有不同也。迨至事之於廟。則形體俱泯。而精氣徒存。孝子以誠格之。則祖妣相隨而至矣。此鋪筵同几。聖人深知鬼神之情狀。以垂爲典禮。而說者乃推其義於女尸之難備。非也。

夫人薦豆執校執醴授之執鐙。

按少牢主婦自東房薦豆與敦贊者一人被錫侈袂。至於諸侯。則外宗佐薦豆籩。內宗佐傳豆籩。又有嬪婦以贊其事。則當祭而與夫人相授器者皆婦官也。執校執鐙亦何嚴焉。然考周官內宰后裸獻則贊瑤爵。此云執醴。或其人歟。且其職兼正服位而詔禮樂之儀。註謂薦微之儀。當與樂相應。此其事有節文。或非淺識所能嫻者。故其下云。贊九嬪之禮事。贊之而亦有時代之歟。不然命婦相夫人記言之屢矣。於男女有別之義。何關。

是故貴者取貴骨。賤者取賤骨。

禡郊之事。則有全脊。四時常祭。體解而薦之。特牲九體。肩、臂、臑、肫、脴。正脊二骨。橫脊一。長脅二骨。短脅一也。少牢十一體。肩、臂、臑、肫、脴。正脊一。膀胱一。橫脊一。正脅一。代脅一。短脅一也。論其貴賤。則肱骨以肩爲

貴脯爲賤股骨以肫爲貴脴爲賤脊骨以正爲貴橫爲賤脅骨以正爲貴短爲賤故特牲九體之用爲俎者尸俎用肩脰俎用臂下於尸也主婦俎用觳折下於主人也宗廟之中接神者莫貴於祝助祭者莫貴於賓祝俎用脾賓俎用脴雖非尊體俱全體也而佐食與宗人俎則折矣自衆賓以迄私臣皆穀脅蓋裸用其餘體之可穀者升之於俎少牢下篇所謂其衆儀也貴與賤之差等明矣然貴如主人不能敵尸之尊賤如私臣亦得分神之惠施澤之無偏如此君子之所爲平其政也

雖使人也君不失其義者君明其義故也

明其義者明乎禘嘗之義通於治國而順陰陽之不偏施以得刑賞之皆忠厚則仁周民物卽德治神明雖有故而使人攝其祀事神豈吐之乎顧孔子曰吾不與祭如不然則此不失其義亦難言矣記者殆爲人君勉之

六月丁亥公假於太廟

周六月爲夏四月宗廟四時之祭宜用仲月觀大司馬仲夏享約仲冬享烝可知而衛莊公以孟夏祀大廟賜孔悝鼎銘者殆如大宗伯王命諸侯則儻註謂王命諸侯假於祖廟非常祭也鄭謂公以孟夏至廟禘祭夫郊禘大祭成王以之賜魯未聞賜衛如云吉禘則衛靈死已十四年矣如時祭也則宜謂之約春秋夏禘鄭已釋爲夏殷祭名衛安得舍周而從先代乎總之其人與事俱不足道故鄭亦率意言之

讀禮記卷十

經解

禮之失煩

安上全下莫善于禮而顧虞其失之煩者蓋世俗迂拘之禮非先王中正之禮也禮減而進亦勝而離繁文縟節而內外不孚于一則玉帛非所以云禮也卑己尊人而彼此不得其安則足恭非所以爲禮也故禮必本之以誠而行之以義

故德配天地兼利萬物與日月並明照四海而不遺微小

德配天地明並日月體也兼利萬物普照四海用也體立用行卽至誠所以參贊位育也然非本體以修其身則德未臻于粹明或蔽于私安得仁育而智臨如此故曰道德仁義非禮不成

是故隆禮由禮謂之有方之士

隆禮言其心由禮言其事其心卽中庸敦厚之心也其事卽中庸崇禮之事也鄭註方猶道也而道爲虛位必藉禮以實之故惟能隆于禮而後心之所之如射者之趨于鵠能由于禮而後事之所履如行者之還其家確有其方立而不易是以歷常變而皆無違于君子之道也士與民之所爭全係于此

哀公問

非禮無以辨君臣上下長幼之位也。非禮無以別男女父子兄弟之親。昏姻疏數之交也。

禮以定民志。朝廷第言君臣足矣。其上下者。則外朝之以爵爲位也。長幼者。則內朝之以齒爲位也。生人之序。有夫婦。然後有父子。有父子。然後有兄弟。故門內首及男女。亦猶家人利貞。必以正位。內外爲先也。由宗族而及昏姻。皆託兄弟之名。必有際會之事。如歲時饋獻。慶弔往來。或疎或數。皆有禮以接之所謂交也。或見二語中無朋友。遂欲以疏數當之。顧天下何事無疏數。而可專屬之朋友乎。哀公問政。夫子示以達道有五。故并朋友數之。今概言禮。豈必如修身之兼備五倫。況下文夫婦別。父子親。君臣嚴。並不及兄弟。竊意言各有當理。無不通。如君臣中有朋友。伐木之嚶鳴求友是也。夫婦中有朋友。車輿之令德來教是也。何必明言朋友。而強經之意以從我乎。

然後以其所能教百姓不廢其會節

倫爲人人之所有。則禮亦人人之所能。先王因其能而教之。所謂以人治人也。顧先王雖不強人以難能。而教亦有必不可廢者。如禮爲衆美之會。則必嘉其所會。而不敢缺也。禮爲萬事之節。則必止乎其節。而不敢踰也。此教之立于大中至正。固未嘗以百姓愚賤姑爲之貶焉。而不委曲以求詳矣。

節醜其衣服卑其宮室

衣服必從其類。王制所謂燕衣不踰祭服也。宮室無取乎侈。曲禮所謂宗廟爲先。居室爲後也。自安其居以至食不貳味。對上文喪祭言之。恐其自養有餘。事神不足。故必戒其奢。以歸于儉。使財之藏于己者不

匱力之供于民者不勞而民亦得以其事畜之餘致孝鬼神此上下同利禮節以興又何至慮切年饑而欲增賦于什二之外哉

國恥足以興之

魯之恥不在強敵而在權臣公室之分乾侯之出國勢不復興者無禮以維之故也晏子之論爲國君令臣共惟令而不違于禮斯共而不貳其心哀公承昭定後果惡三桓之侈則宜慎修其身立于無過百姓將畏而懷之其臣又何敢逞焉乃公於康子則弔爲降禮於武伯則問及得死其言動躁妄不獨以嬖妾爲夫人爲國人所惡也能無有山之孫乎故齊之患在陳氏晏子曰惟禮可以已之魯之恥在三家夫子曰惟禮足以興之

不能安士不能樂天

安士樂天非仁者不能繫辭分而言之則安士爲仁樂天爲智此合而言之則安士者仁之常變不移樂天者仁之俯仰無愧而仁爲愛之理故由政之愛人遞推其事既能愛人則不敢以人從欲而謹言謹行守其身而不失矣既能保身則不敢以身徇遇而處約處樂履其士而不搖矣既能安士則必不以欲忘道而不怨不尤順乎天而心泰矣夫愛人而至安士樂天則踐形復性仁者之能事全矣故下文遂以成身歸之仁孝

不過乎物

在物爲理。不言理而言物者。言理未見爲物。言物則知有理也。故概言其理而不實徵諸物。則詎知乎理之果有合於吾心也。但遇其物而爲究思乎理。則確見夫物之不虛附於吾身也。於物不過斯於禮無違。此示哀公以寡過之道。惟在返身以求其誠。

是故仁人之事親也。如事天。事天如事親。

事親未有不愛者。事親如天。則愛不足盡之。而齋夔凜若嚴君。常恐以遺體行殆矣。事天未有不敬者。事天如親。則敬不足盡之。而呼吸通於帝。謂常若以小心受命矣。視天親爲一體。合愛敬爲一誠。故能全而生之。全而歸之。必不以弗若於道者自絕於天。且必以勿辱其身者成名於親。而仁孝兩無愧矣。此聖人之至教。雖哀公未嘗不動於心。而惕然念及後罪也。

仲尼燕居

子曰給奪慈仁

三者同失。而夫子若甚有惡于給者。非以野逆之爲害猶淺。給之爲害獨深也。蓋爲三子言之也。賜擅言語之長。偃居文學之科。師負高明之質。其斷不失於野與逆。固不待言。而才辨有餘。誠實不足。頗有近於給者。賜以言而中。而夫子戒其多。偃以禮自專。而縣子譏其汰。師以堂堂。而曾子言其難與爲仁。此雖不等於便給之徒。而或未進於慈仁之道。故特爲之究其流弊。而使自勉於禮防也。

郊社之義。所以仁鬼神也。

禮必有義。而其原實出於仁。以陰陽生成之功。美利普於天下。故聖人制爲郊社之禮。報饗隆於鬼神。使非本事父以事天。本事母以事地。誠孝格於上下。則無以明察其義。而郊壇燔瘞。奚取此虛文者爲。故曰。天時雨澤。君子達豐饗焉。達其心之所不容已。以求稱其德之所不能忘。仁爲之也。自禘嘗饋奠以下。言禮不言義者。禮由義起。而義以仁生。理本一貫。舉郊社已可知也。

慎聽之女三人者。吾語女禮猶有九焉。大饗有四焉。

此答子游之間。而慎聽一言。并呼三子而警之。則禮有九大饗有四。非專爲子游言之也。而前章所謂給奪慈仁。亦非專爲子貢言之可知矣。禮有九者。郊以事天也。社以事地也。嘗以四時也。禘以五年也。射以尚功。鄉以尚齒也。食以示愛。饗以示恭也。始死則有饋食之奠。合之爲九。而於九禮中復舉饗言之者。則以饗之名一。而其事各殊。如外饗之饗耆老孤子。酒正之饗士庶子。聘禮之饗賓介皆饗也。而惟兩君相朝之禮爲大。大故儀節繁多。舉其要則有四。鄭註所謂金再作。升歌清廟。下管象是也。孔疏載盧王之說。俱謂大饗有九。固顯背於本文。卽草廬吳氏以大饗四事。并上文郊社五者爲九。亦未爲是。蓋饗仁賓客。上已言之。不應覆舉以參九者之數。細按經文。饋奠爲一禮。郊社、嘗禘、射鄉、食饗皆一語中兼二禮。則九者已賅備於其中。而此節專言大饗之四。似不宜牽連上文。

下管象武

明堂位。祭統皆云。升歌清廟。下管象。不連武言。以象爲文王之詩。武爲大武之樂。本二事也。且不云象舞。

而云管象疑以管奏維清如大射工歌鹿鳴三終下管新宮三終非必舞也舞則大武大夏干羽序興其事當如明堂祭統不得以文有詳略遂以象爲武舞而以管配之也

禮也者理也樂也者節也

此章本與三子言禮而忽以樂對舉者蓋樂之作也偕禮以行不特入門金作升歌下管諸侯爲然而學者本禮以求仁必有其理之不可易藉樂以和禮卽有其節之不可踰非理則禮之節文不生非節則樂之舞蹈或倦而禮顧有資於樂者亦以禮之體嚴人之行之每拘苦而不適惟使之遊於聲容之美以得其舒泰之神則動履周旋從容而中故樂者所以節其禮之勝而不乖於理之當然者也復禮而兼文樂則其於仁也庶幾矣

言而履之禮也行而樂之樂也

爲政之道不外於禮樂而禮樂之本不外於言行言而能踐其實則禁令所頒不爲虛文而皆歸於心之一矣行而能得其安則政德所施不同強設而皆根於身之修矣由是正一己以正百官正百官以正萬民建中和而贊位育雖三代盛王亦距有加於此

孔子閒居

志之所至詩亦至焉詩之所至禮亦至焉禮之所至樂亦至焉樂之所至哀亦至焉此猶未見諸行事也而父母斯民之心無所不至其思慮之獨結窮極幽隱而無所遺則志至矣志至而

心口之相商，味歎長言而不能置，則詩至矣。詩既至，則將以己之好惡同於民，而恭儉以立其制。是之謂禮。禮既至，則將以民之風俗任諸已，而和樂以通其情。是之謂樂。樂既至矣，則一念幸其安全，而歡然以喜。卽一念懼其困苦，而愁焉以傷其哀，不亦至乎？書曰：「功崇惟志，志有所專，而氣足以助之，則一至而無不至。」殆所謂發微不可見，充周不可窮者歟。

無聲之樂無體之禮無服之喪

樂不在聲，積和之氣塞明而已。卽上所謂樂至也。禮不在體，致敬之心定命而已。卽上所謂禮至也。喪不在服，民之無祿我用憂傷而已。卽上所謂哀至也。而復別爲三無者，蓋言其至之微密，其理雖周於無間，而事未徵於有形，故必返而求之。養諸戶居淵默之中，而後能以無者爲諸有之本也。其不言志與詩者，言樂則詩在其中，而志則貫澈於內外終始，而無時無地之可離焉。

地載神氣，神氣風霆流形，庶物露生

天以神妙之氣流行四時，陽居大夏，陰居大冬，卽天道之至教。而崇效猶必卑法者，天之資始難窺，地之資生有象也。撓萬物者莫疾乎風，動萬物者莫疾乎雷，何在非天之所以妙物，而氣行於天，質成於地，故品物咸亨，必屬諸地之持載。聖人奉無私以治天下，其心體固不滯於形聲，而治功必實徵諸教養，務使天下人民熙熙者，亦如物之露生而後安，不得徒慕乎天之無爲也。且以思風不殺，雷不震，物不天札，亦地之承天時行耳，豈能獨成其無私之功哉。

清明在躬氣志如神

前言志氣塞乎天地而此言氣志者蓋當其結念之初則志以帥氣及其致功之後則氣以成志故人之心不能清者由其氣濁也見不能明者由其氣昏也今既法天無私不使客感客形略有以蔽其氣則氣之虛靈克配其志之高朗故所欲皆由於正而於事無不前知謂之如神蓋造化直在其手矣

坊記

故君子禮以坊德刑以坊淫

禮禁於未發之前而刑施於已然之後故禮之坊德不見其束縛之嚴而制外養中循於規矩自無拘於偏私而德之得於天者全矣至若淫德不倦則直忘其性之所秉惟任其情之所流雖以禮教之而未能降心以相從也故禮爲君子設而刑爲小人坊

貴不慊於上

按慊字有二義朱子於行有不慊於心則釋爲快也足也於吾何慊乎哉則釋爲恨也少也由後之說與鄭註無慊恨於君同由前之說與陳氏不使慊於物同是三說皆有可通但上文富不足驕正是不慊於物之義而此以伐冰之家不畜牛羊爲訓仍是制富非制貴也且古來不令之臣每以爵卑祿薄銜恨其君遂爲亂首若使身都貴顯家擁厚貲方且兢兢自保而何亂之敢生則按之上下文義當以鄭註爲是

觴酒豆肉讓而受惡民猶犯齒

實解曰觴食肉之器曰豆酒有厚薄肉有膳羞。鄭註。膳食之美者。陸氏謂之羞者。以其尤美故也。是其美惡異也。今受君上之賜而民猶犯之。豈果民之無良哉。欲爲之防。必自羣臣受爵始。晉文使舅犯將上軍犯以狐毛爲兄而讓之。悼公使士匄將中軍匄以苟偃爲長而讓之。策命之地。而以年齒爲先。晉國之民是以知禮而能生其共也。區區酒肉之讓。固不足言矣。

上酌民言則下天上施

鄭人游於鄉校以議執政子產曰其所善者我則行之其所惡者我則改之是其酌取輿論有古帝清問之誠其不敢違犯民心無厲王監謗之失故其政教所施民之被之者直如天於民從其所欲尚敢有悖慢之事不尊敬其上哉然則上欲防民之亂亦惟以忠以禮奉天以臨之已矣

故君子不以菲廢禮不以美沒禮

君子於交際之間無敢褻也而有禮焉禮不在於多儀而在於役志故瓠葉免首菲也而不廢主獻賓酢之節志不以物輕也肥牡肥狩美也而不掩其娛賓速舅之情志不以物重也聘禮記曰多貨則傷德幣美則沒禮與其禮不足而物有餘也毋甯菲焉爾

故君子苟無禮雖美不食焉

祭而食不祭而食皆食也必其於禮未爲失也有禮則瓦甌可勝太牢無禮則三牲不如簞食豕交獸畜

雖美何貴焉。孔子食於季氏。以其本國之大夫也。則飯殮以尊之。以其進饌之失禮也。則不辭不食肉以絕之。不特此也。餓者不受嗟來之食。雖生死所關。而一簞一豆。必不敢苟。君子之於禮也。蓋嚴。

醴酒在室 醍酒在堂 澄酒在下

鄭註。澄酒清酒也。疏謂澄酒卽澄齊。以其清於醴齊醍齊。故云清酒。然鄭於禮運澄酒在下。何不釋爲清酒。而云澄齊三酒也。蓋禮運爲禱祫。則有四齊。此爲時祭。則惟二齊。鄭註周官酒正。未嘗言有三齊者。故醴酒在室。醍酒在堂。所以朝踐獻尸。饋食醣尸者備矣。其澄酒則事尸禮畢。將酬賓及兄弟。特牲所謂尊兩壺於阼階東者是也。鄭於彼註。亦引澄酒在下。以證之。則雖同一澄酒。而在禮運爲沈齊。在坊記爲清酒。望文立義。不必彼此牽合也。如謂澄清於醴醍。而鄭釋況酒之法。謂醴齊尤濁。益齊差清。泛從醴醍。澄從益。則謂澄清於醴可矣。謂其清於醍而獨名爲清酒。則固不然。

殷人弔於墉 周人弔於家

儀禮既窶而歸。不驅。註云。以親在彼。則弔於墻者。其哀死之心。亦與弔於家同。故殷周皆足以示民不僭。但墻在郊野。尸柩所藏。非精氣所聚。孝子方將迎神以歸。而弔者受弔者顧行禮於此。其遂無先人之敝廬乎。固不若反哭而弔。卽其所作所養之地。以致其如生如存之思。事以卽遠。而引而近之也。孔子曰。殷已懃。吾從周。非謂殷人之不哀也。第未免情有餘而文不足耳。

諸侯不下漁色

春秋宋殺其大夫不名公羊謂宋三世無大夫三世內娶也其於說經或未必然而可爲不下漁色之證禮不臣妻之父母國內皆臣固無妻道而宋以內娶威權下移卒生篡弑則豈惟不足立民之紀而禍端亦有所不及防矣

表記

篤以不揜

禍自外生揜自中起困迫之病在心不在境也心不能篤行善道則不惟處貧賤而有隕穫即處富貴而有充詘境蔽其心而心奪於境如取禽獸者之乘其不備以覆之是之謂揜君子尊仁抱義事事歸於篤厚則雖境之乘人者不勝其逼而心之自得者常有所伸亦何揜乎易曰困亨貞大人吉身困道亨即不揜也然終戒之曰有言不信則斂輝光於晦默之中君子尤以篤爲要

報者天下之利也

不曰禮而曰報郊社之禮所以報天地之生成宗廟之禮所以報祖宗之功德喪紀之禮所以報尊親之恩義禮無不出於報者至若飲食燕享財幣餽遺來必有往往必有來其爲報尤昭然可見君子知禮之原於天者由仁義生不言報施而必欲自循其則下此者則不能矣衆人之情每苦於禮之卑己而尊人辭多而受少輒放縱以自便其私故先王以報示之而以利誘之使知稱物平施我之不敢薄人正爲人之所以厚我其有不欣然以勉循於節文之中者鮮矣

仁者人也道者義也

天下未有不全乎左右而得爲人者以仁爲人則人之有四體猶仁之統四端義固不待他求矣當其由中發外自親親以至仁民愛物裁制以合其宜則謂之義推行以得其通則謂之道故義雖不外於仁仁亦有資於義本仁行義以適乎人倫日用之間而道亦不爲虛位矣故記者不復分承左右而以道義總歸於仁之爲人蓋尊仁之旨也

是故君子以義度人則難爲人

上言器重道遠勉於仁之爲難而此舍仁而言義者蓋仁義本不相離仁有差數以義裁之而長短小大灼然可知故論仁而欲充乎義之量則博施濟民衆修己安百姓雖堯舜猶病未始非義所當爲不亦難乎難爲人卽難爲仁耳惟以衆人之仁望人則管仲之不以兵車爲賢於狐趙齊宣之不忍觳觫爲賢於惠襄固皆有得於仁之一節亦猶五官四體養其大者爲人養其小者亦未始非人焉

容貌以文之衣服以移之

容貌衣服皆儀之在外者也而外以修其儀卽內以定其命故古者教民以九容戒其不敬而粗鄙之志有以文之矣教民以法服黜其不衷而奇袞之志有以移之矣文之移之皆飭其外以防其中而欲民之去不仁以勉於仁其教莫要於此故君子臨民之道首嚴於動容貌大司徒安民之俗終成於同衣服使其不足以齊民風壹民德又奚取此不急之務爲

其舜禹文王周公之謂與

臣之事君義也。事君而庇其民仁也。其仁足爲天下之所歸。而義惟知一人之是戴大德而居以小心者。惟舜禹文王周公爲極難也。四聖人恭儉信讓以仁存心。以義存心。前後可相質也。而舜禹遇禪讓之主。周公終父兄之功。其所遭無不幸者。惟文王事殷。其德以蒙難而益厚。其心以服事而益純。故記者終引大明之詩。以爲千古事君者法。

命之於民也。親而不尊。鬼尊而不親。

鄭註以命爲政令。金華應氏謂造化之所以示人者。夫造化之示人。非一端矣。如其爲民彝物則之類。卽君之所以爲教。而不若著於令之可共知。如其爲風雨露雷之類。卽鬼神之所以爲靈。而終覺藏於幽之未易測。固不如以政教之出於君。與禍福之操自鬼者。人鬼相對。而一親一尊。其義判然有別也。

事君不下達。不尙辭。非其人弗自。

古大臣之事君。雖拜獻其身。而非君能求之。則退而樂其道。不以下自達。而有干於其上。雖先資其言。而苟君能任之。則進而格其非。不以辭爲尙。而有間於其誠。至於獲上有道。必先信友。禹臯周召之轉相汲引。尙矣。他如鮑叔之薦管仲。子皮之舉國僑。皆其平生所爲合志同道者。苟非其人。則如叔向之於樂王。酣雖生死所關。尙弗許之。況以之進身乎。古人出處。卓然不苟。故其功成名立。亦非後世所可及也。否則孰慮而從之終事而退臣之厚也。

否與上句得志相對。謂君不我知。固已隱有去志矣。然或國值艱虞。身有職守。則不得遺累於君。而必熟思審處。以終其事。如介之推之於晉文。必待君歸而後隱。子家羈之於魯昭。必待君薨而後逃。使當兩君奔走羈旅之時。委而去之。則始之執羈約以從者。將何心耶。他如燭之武之退秦師。申包胥之救楚難。亦可謂能終事者。而武不見擢。胥亦逃賞。寧君負我。毋我負君。所謂厚也。

則辭有枝葉

枝葉亦能庇其本根。可相有而不可相無者。但同一枝葉。而見之於行。則英華之發也。徒見於辭。則虛車之飾也。集說以枝葉爲蕪辭蔓說。然玩上文。不以辭盡人。則其辭非不工也。但修辭不立其誠。能言而不能行。故君子不敢信之。若果爲蕪蔓不經。如莊列之論道德。申韓之尚刑名。則識者已能辨其邪正。不待究觀其行矣。嚴陵方氏以此爲明道之言。是也。蓋亦竊聖賢之緒論者。

昔三代明王皆事天地之神明。無非卜筮之用。不敢以其私褻事上帝。

此卜筮專指擇日而言。觀下文不犯日月可知。然如圓邱方澤之於二至四郊。迎氣之於四立。固所謂大事。有時日者。而顧云無非卜筮之用。何也。蓋天地之間。氣化流行。其能爲兩大普生成之功。司威福之柄者。皆曰神明。故凡宗伯所掌。祭統所載。上而日星風雨。下而嶽瀆山川。皆陰陽之精氣所萃。有天下者。治洽幽明。祭百神。卽所以事上帝。而必聽命於龜蓍者。示不敢私以專己。褻以瀆神之意。亦所以尊天地也。若天地則固不用卜筮矣。

卜宅寢室天子不卜處太廟

按聘禮記卿館於大夫大夫館於士註云館者必於廟則諸侯適鄰國必館於上卿之廟此惟主君所授無可易者何卜焉竊意前廟後寢有室有房有東西夾室而正寢則藏衣冠薦時食鬼神之所憑依故卜而或宅其寢或宅其室所以致敬於其先人不敢襲也豈得尊如天子直居諸侯之太廟而不用卜乎然天子猶必以禮籍入則亦未敢慢之

讀禮記卷十一

緇衣

則民言不危行而行不危言矣

道以中庸爲至危者非也。危其言則爲佛老無稽之言矣。危其行則爲申屠於陵不情之行矣。言不危行行不危言。卽中庸所謂庸德之行。庸言之謹是也。豈民所能然哉。責在以身立範之君子。

長民者衣服不貳從容有常以齊其民則民德壹

凡心之如結者難窺其儀一則無不可望而知也。故長民者欲齊其民莫著于衣冠言動之間誠能被服先王誦法仁義恭儉莊敬以從容蒞其下而民之服不衷容無度者自無以仰對于公廷而必勉爲納身于軌物此所爲齊之以禮也。而禮以坊德故曰則民德壹

章善殫惡以示民厚則民情不貳

此魯論所謂舉直錯枉能使枉直之義也。蓋其卽章以爲殫者不忍聽民之因物有遷上之仁也。而其去惡以從善者不過還民之生理本直下之仁也。故示民以厚卽前章所謂尊仁以子愛百姓是也。民情不貳卽所謂民致行己以悅其上是也。觀於此而知禹立三年百姓以仁遂者亦其能以臯陶邁種之德力爲推轂而佐舜舉之以化不仁也。

不援其所不及不煩其所不知

此非泄泄沓沓不責難于君也。蓋其所不及者不必及耳。所不知者不足知耳。不勞于所不及而所當及者。君臣父子之倫則援引而不舍矣。不勞于所不知而所當知者仁義道德之旨而煩苦而不辭矣。舍其末而專圖其本則言之者不數而從之者不勞使於所當及當知之事而曰無勞吾君豈忠臣之引以當道者乎故曰吾君不能謂之賊

夫民閉於人而有鄙心

趨利而避害樂生而惡死者民之同情上暴虐以使之使其情爲人所閉鬱塞而不得伸則鄙背之心勃然以生倒戈相向君父也而仇讎視之矣孔子謂鄙夫患失無所不至彼爲臣且然況于民乎秦漢以下匹夫發難而九廟傾頽者多矣可畏非民虞帝所謂欽哉慎乃有位也

言有物而行有格也

易家人大象言有物而行有恆此以格易恆者蓋恆之爲義无咎而利于正故其象曰立不易方方者倫常日用當行之道卽所謂格也孝經云非先王之德行不敢行如論治必以堯舜爲法論學必以孔孟爲宗立格于前遵行勿變是以生死以之道可窮身可殺而志與名不可奪也按恆與格義當兼備有格而不能恆則爲九三之貞吝有恆而非其格則爲六五之貞凶顧巫醫小技也而能專一以精其業不可謂之無恆則格爲尤重

奔喪

始聞親喪以哭答使者盡哀問故又哭盡哀

按《譜記》始聞兄弟之喪惟以哭對。鄭註謂惻怛之痛不以言辭爲禮而此於哭答使者之後則言問故何也。蓋人當驟而聞訃則哀心勃生不暇有問及哭既畢而氣稍平則必究其疾病之所由生屬纊含斂之作何狀使者畢對哭復盡哀此無論五服之親疎而良心所發無不然者觀于此而知雜記之文有未備註家當以此經補之。

絞帶反位

喪服之帶有二經帶以象大帶絞帶以象革帶。絞帶者繩帶也卽此記所謂絞帶是也孔疏以此爲經帶集說因之然按士喪禮小斂既訖散帶垂今雖奔喪在殯後而見殯如見戶柩何忍遽變其初之散麻喪禮記云旣馮尸主人袒髦髮絞帶其後又云三日絞垂則絞帶之非絞垂明甚此奔喪初哭當始死乃不笄纓而括髮又加首絰于序東直當士喪小斂之節禮所謂變于在家也而有不可變者下云三日成服則必俟又哭三哭之明日而後得絞其垂也必如此而人子之心乃可稍安。

盡哀括髮東卽主人位

據鄭註哭於墓爲父母則袒知經不言袒脫字也觀下文歸入門左北面哭盡哀括髮袒愈可知矣或云哭墓不袒以不見戶柩則入門豈有所見乎凡人心之哀惻每篤于初而殺于既故葬後奔喪初哭則袒

及再哭三哭以至五哭則不袒哀殺也卽除喪後歸亦之墓哭括髮袒誠篤于其初也以父母之喪迫于王事曾不得視含斂躬殯葬人子之痛何如故見墓而思尸柩之在其下則哭而袒入門而見几筵之在其上則哭而袒其情一也其服亦必無殊使謂袒以致哀入門爲重則奔喪何爲先至于墓乎鄭註當不可議

主人出送賓衆主人兄弟皆出門

此節不惟成服拜賓四字有闕文卽主人出送賓二語亦然蓋期功之喪各有主者未必聞訃之人主之卽以親以長宜爲之主而躬居異鄉安得有衆主人兄弟乎若以此爲在家而聞外喪則節首凡爲位語明承上文不得奔喪而爲位者言之上言親此言齊衰以下也集說謂主人衆主人俱指遭喪之家則其上闕文多矣愚意或刪去主人出送賓至相者告事畢而以成服拜賓繼三日五哭卒下於義較爲順從然鄭註無文姑闕其疑可也

問喪

傷腎乾肝焦肺

三者皆心之所爲病也心主火火旺則勝水而傷腎焚木而乾肝爍金而焦肺蓋惻怛痛疾鬱塞其心則火不下濟必益上炎故三者受病腎爲先而肺爲甚至于心之官則思過思而傷脾不待言矣故隣里爲之糜粥以飲食之

糜以食之.粥以飲之.孔疏謂爲旁親以下.蓋三日不食者.孝子則然.其餘有二日不食.三不食.再不食.壹不食者.而喪家三日不舉火.故鄰里爲賙恤之.或疑孔疏爲偏.然先王制禮.過之者俯而就不至者跂而及鄰里.雖恐孝子之毀瘠爲病.亦何敢以非禮遺人.故但以旁親爲言.而其子有老疾者.或飲食之.以免于力不勝喪.亦鄰里所心許也.

家室之計衣食之具亦可以成矣

家室之計.謂計其家之有無.以爲喪之厚薄.而衣服卽準其家財以具之.如死者則有爵弁祫衣之屬.陳於房中生者.則有麻絰散帶之屬.饌於東坫.皆所以爲斂備也.前此猶望其生.至三日則望已絕.不得不已而爲送死之計.其曰亦可云者.蓋恐其心絕志摧.或忽於禮.而特警之以慎其終也.

總者其免也

四世而總.五世祖免.總則必免.服之常也.童子不備成人之禮.今既以少孤當室.而爲族人服總.則必從總.麻著免.故曰總者其免也.爲族人免.則其爲父母免.不言可知.蓋父母本也.倘以其未冠而不爲之著免.則所以推及族人者無本矣.

服問

三年之喪既練矣.有期之喪既葬矣.則帶葛.帶經期之經服其功衰.三年喪當練後.而有期喪既葬之事.則期不得指母而言.鄭註母既葬衰八升.蓋兼及父在者耳.今父既

不在則疏衰四升受以成布七升但降其父一等而與杖期正服之葬後八升者異矣按喪服齊衰三年章父卒爲母註云尊得伸也經與註俱未言其父之服除與未除也獨賈疏以爲除服則伸三年未除則仍服期果何據乎故帶其故葛帶者父母之帶經期之經者諸父昆弟之經也功衰者以大功布爲衰服治麤沽之稱也孔疏不特言父衰而云功衰者經稱三年之喪兼有父爲長子父沒爲母在內則期喪不指母言明甚第其前疏有服父葛帶父功衰之言故補正之集說但取其前疏而不略載後疏何也

麻之有本者變三年之葛

不曰大功之麻而云麻之有本者明其爲一體之戚也士喪禮苴經下本在左註謂重服統於內而本陽也牡麻經右本在上註謂輕服本於陰而統外也賈疏引親喪外除兄弟之喪內除以證之然外除者恩固隆而內除者哀亦非殺喪服齊衰大功用牡麻而不絕本與潔麻帶絰異者傳所謂父子一體昆弟一體其輕于斬齊者亦微矣故當三年練冠而遇大功之喪得以其麻變之此先王因服以明恩而大功所以有異居同財之義也

世子不爲天子服

大夫之適子得爲君如士服而世子不得爲天子服者非徒以繼世之嫌也蓋大夫適子爲君服斬則世子亦宜爲天子服斬而其父爲諸侯旣服斬衰三年矣不疑於國有二君耶若從夫人服期則世子固天子命之以世其國非若大夫之子不世爵祿者服期不已輕乎故先王斷爲不服以自同於畿外之民所

以尊天子而且全其父於獨主國中之義也。

君所主夫人妻

妻之爲齊上下所同稱也。論語邦君之妻君稱之曰夫人則夫人卽妻此言妻而冠之以夫人者別乎世婦下之妻也。妾不體君故君爲妾無服而爲妻服期其喪必自主之。悼公之母死哀公爲之齊衰有若譏其非禮。公曰魯人以妻我援妻之稱以文其服妾之過則妻之卽爲夫人明矣。

間傳

大功貌若止

水不流曰止水止者斂而不舒之謂也。大功雖輕於斬齊而哀戚存於其心則跔蹐形於其外觀下文言而不議雖不能無言也而不議則必止於其節而不敢踰。玉藻曰色容顛顛言容繭繭可以想止之義焉。總麻十五升去其半

八十縷曰升朝服之布十五升是一千二百縷也去其半而爲總麻則六百縷也。總麻之喪輕於小功而小功十升十一升十二升其縷反多於總朱子疑焉。魯齋彭氏遂謂去其半之文統承斬齊以下言之於布縷多寡之數序固順矣然儀禮喪服至總麻三月章始發傳曰總者十五升抽其半並不見於斬齊大小功傳中彭氏之說非是竊意同於朝服者欲其縷之細也抽其半數者欲其布之疏也。服至總而窮不得不細總以親者屬不得不疏此亦如列國大夫爲天子服總衰以恩輕故精其縷以尊重故少其升然

則先王之制爲總服。其細既過於小功。則其疏不得不同於齊衰。所以酌親疏輕重之間而參用之。以得其宜者也。但不知朱子之意以爲何如。

輕者包重者特

此言不以齊衰之新喪奪斬衰之恩也。雖斬衰既虞卒哭受服以葛。不及斬衰之新喪以麻。而男子輕腰。婦人輕首。輕者可兼兩喪而服之。所謂包也。男子重首。婦人重腰。重者則惟服其斬衰之絰帶。所謂特也。包則不特。恩有所並隆也。特則不包。哀有所專致也。喪服傳謂父至尊者是已。

三年問

三年之喪二十五月而畢

古人守禮惟嚴。父母之喪。不祭不弔。齊衰大功之喪。不冠不昏。下至小功總之喪。必既殯而從政。倘非告終有節。則因三族之不虞。而廢禮者多矣。故三年之喪。斷以再期。其二十五月而祥。二十七月而禫。所以伸孝子之餘情。使之漸趨於吉。雖哀慕未忘。不能不俯而就之也。且先王制禮。將使天下之人皆行之。豈獨爲賢知設哉。

然則何以至期也

鄭註。期者。謂爲人後及父在爲母。孔疏駁之。謂何以至期者。但問其一期可除之義。顧一期可除章內本無此言。而三年之喪二十五月而畢。則上文言之已詳。故承上文而問爲人後者爲其父母與父在者之。

爲其母皆宜三年何以降而至期也。鄭註於文義爲順且宰我問短喪夫子責其不仁豈記禮者而欲以期易三年乎下文天地已易四時已變蓋就親屬之宜期者言之非謂旣期有可除也不然舊沒新升鑽燧改火宰我意與此同夫子何不許之。

深衣

短毋見膚長毋被士

深衣衣不殊裳取其被體深邃何至有見膚之事蓋約言其長短之度當以人身爲準耳見膚則於身爲不足被士則於身爲有餘所謂見膚者豈必顯露其體但使反袂而不及肘負繩而不及踝則衣與裳不稱其身雖不見膚而有可以見膚之理非制之善者也故下文爲格爲袂爲帶皆不以尺寸言之者意與此同

續衽鉤邊

鄭註衽在裳旁屬連之不殊裳前後也其註玉藻云衽屬衣則垂而放之是指朝服之衽垂而下覆也屬裳則縫之以合前後是指深衣之衽合而當旁也正與此註互相發明按深衣之制用布六幅裁爲十二片則一有邊一無邊其前後接續處必取其幅之有邊者合而縫之復屈折其所縫之邊而重緝之所謂鉤也其云如今曲裾者漢時服飾已不可知竊意裳之在旁既不相連則趨走之時或露其襦袴故更續一布於裳與衣之右衿相屬此所以掩其裳之交際者取曲裾之意耳而孔疏以唐之朝服曲裾兩旁俱

有者釋之殊不其然。

以直其政方其義也。

尚書以齊七政史記律書則曰七正詩有今茲之正禮有不自爲正皆言政也古政正字通用孔疏以直其政教爲訓非也況其下明引坤之六二則所謂直其政者指其心之無邪方其義者指其事之有制深衣雖上下同服而庶人以之行禮士大夫不過用之燕居敬義立而德不孤正當於燕處時使之顧衣服而思其義焉。

投壺

某固辭不得命敢不敬從

投壺之禮與射略同顧射賓一請卽許而此則請之三辭之三必不得命而後從者蓋射以習禮奉公家之令不可已者也投壺以樂賓成一人之歡可已者也傳曰酒以成禮不繼以淫而投壺日中於室日晚于堂大晚于庭正爵旣行尚有無算爵不幾卜其晝更卜其夜乎燕好之情愈厚則揖讓之節宜愈嚴故投壺之矢主人自奉而拜受拜送不比射矢之爲弟子授之耦自取之也。

命弦者曰請奏狸首

比投壺者士也則宜奏采繁大夫也宜奏采蘋而顧奏狸首以爲節則必兩君相燕以投壺樂賓者如齊侯之朝晉是也孔謂知是大夫士禮者以燕禮大射每事云請於公不云主人請賓不知彼是諸侯與其

羣臣燕射，則云請公今兩君尊卑相等，不宜作主賓平敵之辭乎？又云投壺奏狸首，猶鄉射奏驕虞，義取燕飲不計尊卑，不知鄉射雖主于州長，而鄉大夫以五物詢衆庶，將以爲後日賓興之舉，故奏天子之詩，使羣士有所觀感，亦猶入學肄雅以官其始。投壺有何大禮乎？且弦爲琴瑟堂上之樂，鼓取魯辭堂下之樂，幾與大射之樂器同。以士大夫之私燕，而用大師之官備人君之奏，其僭竊之罪爲何如？故知此記爲諸侯也。

當飲者皆跪奉觴曰賜灌

飲未有言灌者，灌則宗廟之祭，始事求神者也。外此惟諸侯朝王，上公再灌，侯伯壹灌。諸侯相朝，灌用爵鬯，其他賓主無聞焉。今跪而奉觴，不曰賜爵，而曰賜灌，是尊主人之酒，待己如神明也。鄭註引典瑞之辭曰：以灌賓客，亦以王禮釋之。其爲諸侯愈無疑矣。但投壺不見於六官十七篇中，不知自天子至士，其差等爲何如也。

馬各直其算

射惟有算，投壺更有馬。蓋射祇有不勝之罰，投壺兼有勝者之慶，故爲立馬以當釋算之前也。古者賓主交好，多以馬相贈遺，故聘禮私覲束錦乘馬覲禮，天子之賜侯氏路先設四亞之，而稱人之富者，如孟獻之百乘，齊景之千駒，皆數馬也。投壺之禮，主人樂賓，欲其綏祿介福，故以馬爲慶。蓋取康侯錫馬蕃庶之義也。而說者謂投壺所以習武，馬取勝敵果爾，則射何以無馬。

讀禮記卷十二

儒行

道塗不爭險易之利冬夏不爭陰陽之和所履者大道坦塗不以欲速而出于險不以畏難而趨于易所謂行不由徑也至若冬以陰勝夏以陽勝欲求其和則暑疹繩縕寒襲貉狐必窮物力以爭之儒則被服不足于體而炎涼無介于心所謂樂天不憂也不爭險易則無人事之患不爭陰陽則無天時之患所以愛死養身者道在此矣舊說似淺

不祈土地立義以爲土地

土地者君得之以爲國臣得之以爲家要必以義居之而後上下各安其分儒能立其所以正萬物者亦何祈于百城故耕幸樂道非其義則祿之天下而弗從叩馬陳辭如其義則餓于首陽而不悔蓋土地爲利之所從出而義爲物之所以和故倘來之浮雲不能易吾心之裁制也春秋子臧季札之倫雖硜硜自守其節要皆爲一時義士即可爲千古真儒

往者不悔來者不豫

楚狂之諷孔子曰往者不可諫來者猶可追諫則悔追則豫也孔子之仕止久速何悔何豫中庸素位而行不願其外儒者之立身有之

其居處不淫其飲食不溽其過失可微辨而不可面數也

居處飲食末節也。不淫不溽則大德不踰。小德亦無出入。尙可過失之有。故微辨者充類至盡。或見其有所失於小也。面數者。鳴鼓而攻。直斥其有所失於大也。君子聞過則喜。從諫弗咈。寧不欲人面爲示之。而克勤小物。不累大德。人自無可爲指數者。李氏曰。微辨細核也。面數明指也。其過失之小。僅可細核。無可明指。其說較勝諸家。爲合上二句觀之。愈見其是。

毀方而瓦合

此非和光同塵之謂也。毀己之方以爲瓦合。亦欲引其人以進於賢。使之有所遷改耳。倘必嚴顏厲氣。圭角凜然。彼必畏而不敢進。故仲尼不爲已甚。雖互鄉童子亦可見也。此句專承衆言之。石林葉氏以毀方爲慕賢。瓦合爲容衆。天下有賢者而亦惡方喜圓乎哉。

不望其報

進賢爲國。非以植黨。何報之可言。趙盾之舉韓厥於公也。厥爲司馬。而戮其車。祈奚之救叔向於死也。向旣朝君而不告免。在厥與向固知舉我免我者之非有私於我。故守正不阿。以全二子之高誼。而天下之名皆歸之。是不報乃所以爲報也。夫趙盾、祈奚在春秋大夫中稍爲賢者。尙能不責報於所舉所免之人。況儒者乎。孔子因季桓子見行可之仕。而墮都出甲。先爲之強公弱私。是以不望報之心待桓子。而所以報之者益厚。惜乎桓子之非儒。并不能爲盾與奚之庸中矯矯也。

聞流言不信

流言者無根之言如水流然前文流言謂人之宣言謗已也此云流言謂人之傳言謗友也人謗已則惟增修其德而不必究其言之所自來故曰不極人謗友則惟內斷於心而灼然見其言之無可據故曰不信荀子曰流丸止甌流言止智智者既知已即能知友惟以兩人之志與道決之

冠義

服備而后容體正顏色齊辭令順

禮義之行莫重於容體顏色辭令而必責之於備服後者服爲禮設有其服而後修其容色文以辭令彼童子服采衣時不過教之以正爾容執爾顏慎爾唯諾而已至於旣冠則玄冠以齋皮弁以朝爵弁以祭凡上而事君外而見賓幽而交神各有其服則各有其容色辭令必適與之相稱而後正則恭齊則一順則從也故冠辭曰棄爾幼志又曰敬爾威儀此之謂也然世豈無習儀以亟而不足爲知禮者乎故所謂淑慎爾德者必先在於君臣正父子親長幼和而皆於冠後責之冠豈不重歟

醮於客位

不曰禮而曰醮者以適子冠於東序庶子冠於房外而及其禮之則適之用醴筵於戶西與庶之醮於尊東俱客位也故變醴言醮記欲兼爲庶子言之雖庶子無著代之義而責以成人之德者父之望子無適庶一也儀禮不醴則醮註謂國有舊俗聖人用焉則適子亦有用醴者然非其常也至凡醮者不祝見於

鄭註不見於經文觀賓之字之曰伯某甫仲叔季惟其所當易其次而不易其辭則安知辭之不用於庶子乎兄弟具來禮儀有序固不專爲適子責矣故吾謂此記之言離所以該庶子也

遂以贊見於卿大夫鄉先生

旣冠而奠贊於君禮也其遂見卿大夫鄉先生者非徒行成人之禮亦求所以爲成人者訓也晉語趙文子冠遍見諸大夫終見張老張老曰從欒伯之言可以滋范叔之教可以成夫學務其實則滋事戒其驕則大德能取善則有成人道備矣能爲人而後可以治人三加彌尊非爲文飾豈如吳子夫差呼好冠來耶

昏義

再拜奠鴈

按士昏禮主人迎於門外西面再拜賓東面答拜及其揖讓升堂賓再拜奠鴈而主人不答者蓋此贊爲見女設非爲主人也當其時父在阼階西面母在房戶外南面女在房中南面婿於房外當楣北面賈疏引何休公羊註云夏后氏逆於庭殷人逆於堂周人逆於戶後代彌文逆於房親之也而必以贊拜者敬而親之以章其別也禮無不答而女亦不答者不敢當其尊禮故俟婿旣降而後出房以聽父母之誠命也而或以此爲伸女父之尊謬矣

子冠而酌用醴婦見而酌亦用醴別於庶子庶婦之用醴也。而皆筵之於賓位者。子敬其成爲人。婦敬其成爲婦。或正位乎外而樹儀刑。或正位乎內而司中饋。所以責之者重。故所以禮之者隆也。

舅姑共饗婦以一獻之禮

一獻士禮也。鄉飲用之。其禮主獻賓酢。主又酬賓。而正爵畢矣。此舅姑饗婦。則婦席於戶牖之間。舅姑皆席於阼。舅洗於南。洗實爵以獻婦。而婦祭卒爵。婦洗於北。洗實爵以酢舅。而舅祭卒爵。姑又洗於北。洗實爵以飲。更酌禪以酬婦。婦奠之而不舉。亦如鄉飲之賓禮然。賈疏所謂舅獻姑酬。共成一獻者也。前此使贊體婦。以其新成婦道而親之。至此厥明。則昏已三日。舅獻婦姑薦脯醢。婦酢舅。自薦脯醢。更不用贊。則愈親之。蓋將以家事付焉。故與冠禮同言著代也。

教於宗室

鄭註儀禮以宗爲大宗之家。蓋大宗收族。凡同宗祭祀冠昏喪紀皆告之。其族燕族食則會宗人而敍其昭穆。別其親疎。故其家禮法詳明。可爲族人取則。雖女子十年不出。姆教已先。而將嫁則必教之。於此以益成其貞順婉娩之德。迨三月教成。卽於大宗之廟而告事焉。蓋女雖疎遠。溯其源亦別子爲祖者之裔也。其祭則宗子主之。而使女觀其廟中行事。以佐宗婦而薦豆籩。此可見古人婦教之嚴。而宗法之有係於倫理亦大矣。

鄉飲酒義

主人拜迎賓於庠門之外

主人謂鄉大夫。迎賓於庠而飲之酒。蓋三年大比以興賢能之禮也。州黨皆統於鄉。州長之飲而習射。黨正之飲而尚齒。卽鄉大夫受教法于司徒。退而頒之于鄉吏者。故此記兼及之。而國以尊賢爲重。儀禮鄉飲。主人就先生而謀賓介於射則曰主人戒賓而已。不預謀亦無介。則其禮輕可知。故篇首特著之曰庠門。以明其事非州黨之所得而主也。

鄉人士君子

註以鄉人爲鄉大夫。然篇首言主人。下文屢言主人。不應此獨稱爲鄉人。竊意鄉人是其民之來觀禮者。鄭註儀禮。所謂鄉黨飲酒必於民聚之時。使其見化。知尚賢尊長也。士則鄉人中之已仕者。君子則其位尊德盛者。記云樂作。大夫不入。旣旅士不入。卽此士君子是也。或曰。下文尊於房戶之間。專言賓主。不應夾入觀禮之鄉人士君子。蓋此爲明日之息司正徵唯所欲。以告於先生君子者。若然。則上節爲興賢能。此節爲飲國中賢者。其說亦通。

合諸鄉射教之鄉飲酒之禮而孝弟之行立矣

鄉飲。鄉射詳於儀禮。而黨正之飲略見於周官。其曰國索鬼神而祭祀。則以禮屬民。而飲酒於序。以正齒位。想其立賓設席獻酢飲酬。應與賓賢之禮無異。故亦名之曰鄉飲。及爵行無算。舉國若狂。不幾始於治卒於亂乎。故特明其或坐或立之儀。三豆六豆之數。見雖一日之澤。而尊長養老明著爲教。俾觀者油然

生孝弟之心。此記所以補儀禮之未備也。固與賓賢顯爲二事。說者必欲牽合爲一。以爲賢同則論齒。顧鄉大夫之興賢能賓與介各一人耳。誰與同之。似不如鄭註之專屬黨飲爲安。

貴賤之義別矣

此速賓拜賓皆引儀禮文而釋其義。蓋鄉飲之禮。賓貴於介。介貴於三賓。三賓貴於衆賓。故席賓於牖前。席介於阼階。席三賓於賓席之西。而衆賓則以次立於堂下。及其飲之。於賓有獻酢酬之節。於介則不酬。於三賓則不酢。於衆賓則不拜受爵。貴賤明。斯隆殺辨也。嚴陵方氏以爲介輔三賓。而獻酢酬惟三賓得備之。其混賓爲三賓。不惟與儀禮不合。并與本經立賓象天。介象日月。三賓象三光之文。顯相違背。集說取之何也。

三賓者政教之本禮之大參也

三相參爲參。大國三卿禮曰。設其參。謂其相參以列職。亦相參以謀政也。飲立三賓。義亦如之。有三卿而朝廷之綱紀以立。有三賓而庠序之敬讓以明。故曰政教之本禮之大參也。上言賓必南鄉。介必東鄉。而三賓之席。則在賓之西。介之北。如相參焉。故終言之。以著其尊於堂下之衆賓也。

射義

是故古者天子以射選諸侯卿大夫士

天子與諸侯射賓射也。與卿大夫射燕射也。與士射大射也。一語而兼三事。蓋言自天子以至於士。無不

肄其業者以明生而懸弧之義故卽繼之曰射者男子之事也或謂選其人以助祭顧選而助祭惟士有之若列侯入觀當祭之時無不相祀而太宰贊幣司徒奉牛職有所司亦何待選所謂選者不過中多爲雋以考其德而著其賢使不勝者慕而勉焉蓋欲化天下弧矢之威而納諸禮陶樂淑之中也

諸侯歲獻貢士於天子

鄭註諸侯於天子三歲一貢士語本書傳而或據經文以爲諸侯歲獻卽貢士然觀周禮鄉大夫之職考德藝而興賢能必待三年大比之後是畿內尙不能一歲一貢況侯國乎然則貢士與歲獻連文者蓋每歲有獻而或值貢士之歲則士與計吏偕行也

旄期稱道不亂者

射禮旅酬之後二人舉觶爲無算爵始也禮成樂備而有旄期在位將以憲老乞言故欲得稱道不亂之人焉賓筵之卒章曰匪言勿言匪由勿語庶幾醉不伐德矣然非抑戒之淑慎溫恭素有契於聖學安能言皆法乎先王此序點所語者蓋衛武之流宜其存者勵也

循聲而發

鄉射奏騶虞大射奏狸首司射皆北面命曰不鼓不釋則三耦拾發必與其聲相循然公樂作而后就物稍屬不以樂志說者謂四矢之行不過與鼓樂之節稍相屬而已遲速惟志不必適中其聲以此見節比於樂之難爲君寬愈以顯賢者之能事殊絕也

燕義

賓入中庭君降一等而揖之禮之也

先是小臣納卿大夫賓從入矣及公命爲賓則出立於門外東面擯者納之而後入前以臣此以賓臣卑而賓尊也故當定位中庭君邇卿卿邇大夫揖而進之君非不違其位猶立阼階東南此賓入及庭則降階一等揖之乃升就席雖宰夫爲主臣固不敢抗君而獻酢旣畢君必親就西階以酬賓者皆所以禮之也此天道下濟地道上行用以成泰交之隆而興道致治之有與同志也

君舉旅行酬而后獻卿卿舉旅行酬而后獻大夫大夫舉旅行酬而后獻士士舉旅行酬而后獻庶子

君與卿燕大夫爲賓與大夫燕亦大夫爲賓所以明嫌而燕之意則不專在賓也況國家由卿及士莫不效其勤勞則莫不宜加以慈惠故飲酒之禮成於酬而遍於旅旅之爲言衆也按大射賓受公酬告於擯者請旅諸臣請固不敢自專旅則欲廣君賜燕禮記曰凡公所酬旣拜請旅侍臣言凡則卿及大夫皆得請之故君於工歌笙奏之前爲賓爲卿爲大夫三取媵爵以舉旅及脫屨升坐之後并爲士取賓所媵爵以舉旅凡四旅也雖庶子官卑君不爲之舉旅而主人於獻卿獻大夫獻士庶子之餘遂遍及於左右正與內小臣則凡席於堂上立於堂下者無不欣欣焉醉酒而飽德祭統所謂惠均則政行政行則事成事成則功立者固不獨於廟中之旅酬見之

聘義

介紹而傳命君子於其所尊弗敢質敬之至也

禮無辭不相接故聘必始於傳命而或五介三介以紹承者賓之所以尊君也尊之則不敢徑行之禮有以文爲敬者此矣顧當執玉之時賓則襲而致命者固所以重寶瑞亦欲見兩君之推誠相與以質不以文也蓋門外之傳命傳己之所以來堂中之致命致君之所爲交故禮尚相變焉

壹食再饗燕與時賜無數

饗食禮重燕禮輕故饗食在廟燕在寢時賜更輕則禮所謂乘禽倣獻宰夫歸之於館而已集說謂饗食在朝誤也或謂饗行於廟食行于朝亦非按公食大夫禮公迎賓於大門內揖入賓從及廟門公揖入賓入則食不在朝明矣饗禮雖不可考而食禮有云設洗如饗則同在廟也傳謂饗有體薦又云設机而不倚爵盈而不飲其禮更嚴於食而食惟壹行饗則再舉者豈饗訓恭儉以示聘使往來之專爲行禮而在飲食乎若燕示慈惠則君之私恩固不得限之以數矣

瑕不掩瑜瑜不掩瑕

曲禮玉曰嘉玉謂無瑕也顧玉之無瑕者或寡使瑕與瑜得相掩則內外不符矣故人自聖神以下不曰無過而曰寡過

喪服四制

喪有四制變而從宜取之四時也

恩、理、節、權記禮者自釋四制甚明。蓋喪服生於恩，恩有所不能及，則以理推之。理有所不可踰，則以節限之。節有所不克赴，則以權斷之。所謂窮則變，變則通也。乃或於四制中各求其變，謂恩義二制不可謂變而從宜，遂以殯葬大小祥釋之。則下文以恩制、以義制、以節制、以權制俱不可通。

凡此八者以權制者也

權制有八，說者各殊。試以不髽不袒例之，則必禮所當然而不能然，斯謂之權。故或數八者之目，以爲父在爲母期一也；童子婦人不杖二也；扶而起者不杖三也；面垢者不杖四也；合之禿者、僵者、跛者、老病者爲八，皆同居人子之禮。而或厭於尊，或苦於幼，或迫於貧與病，故先王從其權以制之。孔疏數杖而起與不應杖而杖，杖而起正也；不應杖而杖，則有擔主輔病之理焉。事以義起，不可爲權。

說禮之家，精奧推鄭註，博洽惟孔疏。然正義初成，而馬嘉運駁正其失，則其時已有不滿於人志者矣。元陳雲莊集說明時，雖立於學宮，而學者多譏其疎漏。蓋禮本襍取漢儒之言，一書中已自有不可貫通者，故人人得以意見爲說，然究不可空言爭。終當以註疏爲根柢，吾叔沈潛於是經有年。本之鄭、孔，兼取陳氏書，及宋衛湜所集百四十四家之說，與近世言禮如安溪、靈臯諸名家，皆一一研究，著爲是編。於文義求其安，於疑義存其是，於異義折其衷，庶幾破門戶之見，酌異同之論，而非斤斤於抱殘守匱，負其一知半解以自異者。後之讀是書者，當不河漢余言。嘉慶十七年十二月姪紹

祖識。讀禮記

卷十二

